

弘

簡

錄

弘簡錄卷二百八

明刑部員外郎仁和弘齊邵經邦學

皇清翰林院侍講學士四世孫遠平校閱

載記 遼內族

曷魯

孫斜軫弟龍烈羽之

斜捏赤

姓老古

頗德

海里

孫阿沒里

敵刺

附弘古

欲穩

附祖聖押

鐸臻

祖黃古只弟

圖魯窘

巨黑思勃古哲

耶律吼

何魯不敵烈

屋質

子唐古

安搏

父迭里

耶律洼

孫學古

休哥

孫馬哥

撒合

夸臘葛

耶律沙

抹善補何魯補

化哥

弟弘

仁先

子捷不也弟

室魯思

世良

益奴

的珠仙童

題子

八哥

瑤質

古昱

子宜新

和尚

特麼

孩里

耶律玦

趙石柳

引吉

幹特刺

棠古

耶律曷魯字控溫一字洪隱迭刺部人祖匣馬葛簡憲皇帝從
兄父偶思述輩時爲本部夸離董生三千長曷魯次覲烈羽之
曷魯性質厚在翳亂與太祖遊從父釋魯奇之曰是兒必興我
家既長與易裘馬爲好曷魯事太祖彌謹會滑哥弑其父釋魯
歸罪臺晒爲解太祖顧謂曷魯是賊吾不能忘將反噬我自是
常佩刀相從以備不虞久之偶思病召其子曰阿保機神畧天
授汝兄弟赤心事之時太祖亦來問候執其手曰爾命世奇才
他日可委吾兒以事吾已諭之矣遂以叅預捷馬狝沙里部族
事因領數騎召小黃室韋來附本以肺腑之親任幃幄之寄凡
軍國事非其議不行及討越兀與烏古部以爲前鋒有功復討
奚部其長木里偪儉而壘太祖攻莫能下命曷魯持一筈往諭
之旣入爲所執說以契丹與奚言語相通實爲一國我夸離董

於奚本無較轆之心漢人殺我祖奚首夸離望怨次骨日夜思
報漢人顧力單弱使我求援於奚傳矢以示信耳夸離重受命
於天撫下以德故能有此衆今奚殺我進天背德不祥莫大焉
且兵連禍結當自此始國何利乎木里咸其言乃降及爲于越
秉國政欲使代已辭曰賊在君側未敢遠去與李克用相會雲
州時曷魯侍克用顧而壯之問偉男子爲誰應以吾族已而羣
臣奏遙輦痕德堇可汗遺命請立太祖太祖辭曰昔吾祖雅里
皆以不當立而辭今若等何以復爲是言曷魯進曰曩者之辭
遺命弗及符瑞未見第爲國人所推戴耳今先君言猶在耳天
人所與若合符契恐不可違祖曰人事固然汝焉知天道對曰
天道無私必應有德聞于越之生神光屬天異香盈幄夢受神
誨龍錫金佩天以我國削弱齟齬日久以故生聖人以興起之

且透輦九營基布非無可立者獨不思昔者釋魯言乎吾猶蛇
兒猶龍也太祖猶未許是夜獨召曷魯貴曰衆以遺命迫我汝
不明吾心亦俛隨之耶曷魯曰自立阻午可汗相傳十餘世亂
君臣之分隳紀綱之統委質他國若綴旒然羽檄遙午民疲奔
命興王之運實在今天時人事幾不可失祖乃許之明日卽
皇帝位命曷魯總軍國事時制度未講國用未克扈從未備諸
弟覬覦非望始於太祖暨行營置腹心部選諸豪健二千餘充
之以曷魯及蕭敵魯總焉已而諸弟亂作又命總領軍事討平
之以功授迭刺部夸離董時民更焚剽日就抗傲賴以撫輯有
方畜牧益滋民用富庶遂被烏古部自是震懾不敢復叛迺請
制朝儀建元率百官上尊號備禮受冊拜爲阿魯敦于越阿魯敦者
遼言盛名也後遇伐西南諸夸數爲前鋒神冊三年七月皇都旣成

燕羣臣以落之是日得疾駕臨視問所欲言對曰陛下聖德寬
仁羣生咸遂帝業隆興臣蒙寵遇言如著龜謀成戰勝其君臣
相得之誠若吳漢之於光武臣今瞑目又何憾哉惟析迭刺部
議尚未決願亟行之遂薨年四十七太祖二十一功臣各有所
擬獨曷魯爲心腹嘗流涕曰斯人若登三五載吾謀蔑不濟矣
既葬賜名其阡宴答山曰于越塔立石紀功清寧間命立祠上
京子惕刺撒刺俱不仕 孫斜軫字韓隱性明敏不事生產保
寧初蕭思溫薦其有經國才景宗曰朕知之第佚蕩豈可羈屈
對曰外雖佚蕩中未可量乃召問以時政占對剴切由是器重
妻以皇后姪女命爲招討使節制西南面諸軍仍授河東改北
南院大王乾亨初宋再攻河東命從耶律沙至白馬嶺遇敵沙
等戰不利斜軫赴之令麾下萬矢齊發敵氣耗而退是年秋宋

下河東乘勝襲燕奚底與蕭討古逆戰敗績退遁清河北斜軫取其青幟軍于得勝口以誘敵敵果爭赴因繞出其後奮擊敗之統和初皇太后稱制益見委任以爲樞密副使尊號推恩加守司徒爲北院樞密使會討女直命爲都統駙馬蕭勤德爲監軍四年正月丙子上獲女直生口遣近侍泥里吉賁詔旌其功二月甲寅來朝行飲至之禮賞賚有差后親帥師救燕又爲山西路兵馬都統楊繼業陷山西諸郡各以兵守白屯代州斜軫至定安擊敗賀令圖軍追至五臺斬首數萬級明日至蔚州敵不敢出書帛射城上蕭以招慰意陰聞宋軍來救令都監耶律題子夜伏兵阨險城守者突出伏發擊其背內外二軍俱潰追至飛狐斬首二萬餘級遂復蔚州令圖潘美復以兵來逆于飛狐又擊敗之宋軍在渾源應州者皆遁奏復寰州俄而繼業出

兵令蕭捷禦伏兵于路明旦擁衆爲戰勢繼業麾幟而前斜軫
佯退伏兵發併力而進繼業敗走至狼牙村心惡之欲避不可
得爲流矢所中被擒責以汝與我國角勝三十餘年今日何面
目相見繼業但稱死罪而已遂復朔州七月丙子奏捷及上所
獲將校印綬誥勅并函繼業首以獻詔以傳示雲應諸州守臣
皆棄城而去八月乙卯還闕加守太保封魏王部將校前破女
直後有宋捷第功加賞十九年復從南伐九月癸卯卒于軍太
后親爲哀臨仍給葬具庶子狗兒官至小將軍太平八年孫骨
欲婦阿指斥乘輿事覺骨欲爲之隱並坐之籍其家 覲烈字
兀里軫以謹愿寬恕大見器使太祖卽位入侍帷幄與聞政事
神冊三年命代曷魯爲迭刺部忬離董屬以南方事會討党項
命副皇太子爲先鋒軍至天德雲內分道並進覲烈率偏師渡

河力戰斬獲甚衆天贊初分迭刺部爲北南院以爲南院夸離
董時大元帥率師由古北口畧燕地覲烈狗山西所至城堡皆
下有功錫賚甚厚從伐渤海拔扶餘城畱與寅底石守之天顯
二年畱守南京十年卒年五十六羽之字寅底晒小字兀里
幼豪爽不羣長嗜學通諸部語太祖經營之初多預軍謀天顯
元年命爲東丹王中臺省右次相時人心未安左大相迭刺不
諭月蕤羽之蒞事勤恪威信並行太宗卽位上表曰我大聖天
皇始有東土擇賢輔以撫斯民不以臣愚而任之國家利害敢
不以聞渤海昔畏南朝阻險自衛居忽汗城今去上京遼邈旣
不爲用又不罷成果欲何爲先帝因彼離心乘機而動故不戰
而克天授人與彼一時也遣種寢以蕃息今居遠境恐爲後患
梁水之地乃其故鄉地衍土沃有水鐵鹽魚之利乘其微弱徙

還其民建萬世長策彼得故鄉又獲木鱖鹽魚之饒必安居樂業然後遷徙以翼吾左突厥党項室韋夾輔吾右可以坐制南邦混一天下成聖祖未集之功貽後世無疆之福表奏帝嘉納之是歲詔徙東丹國民於梁水時稱其善人皇王奔唐羽之鎮撫國人一切如故以功加守太傅遷中臺省左相會同初以冊禮赴闕加特進表奏左次相渤海大素賢貪墨不法事詔僚佐部民舉有才德代之卒子和里終東京留守 覲烈孫虎古字海鄰少穎悟重然諾保寧初補御璣郎君十年使宋還以宋取河東之意聞于上合先事爲備韓匡嗣問何以知之對曰諸僭號之國宋皆併收惟河東未下今宋講武習戰意必在漢明年宋果取太原乘勝以逼燕帝以其能料事器之曰吾與匡嗣慮不及此授涿州刺史統和初皇太后稱制召赴京師復以事與

韓德讓相忤因怒取護衛所執戎杖擊其腦卒 子磨魯古字
遜隱爲人有智識善射統和初拜南面林牙四年宋侵燕太后
親征命爲前鋒手中流矢拔而復進頃之創盛不能戰后命與
北府宰相蕭繼先巡邏境上累遷北院大王七年伐宋爲先鋒
與奴瓜破其將李忠吉于定州卽軍中以疾卒

耶律斜涅赤字鐸益與撻烈俱六院部舍利襲古直之族早隸
太祖幕下嘗有疾賜樽酒飲而愈遼言酒尊曰撒刺易以爲字
太祖卽位掌腹心部居佐命功臣之一天贊初爲北院夸離董
帝西征至流沙諸夸潰散命以撫集威聲大振從討渤海破扶
餘城忽汗已降復叛命諸將分地攻之詰旦斜涅赤感勵士伍
鼓譟登陴敵震攝莫敢禦遂破之天顯中卒年七十 姪老古
字撒懶其母淳欽皇后之姊幼養宮掖旣長沉毅有勇畧隸太

祖帳下卽位列于佐命功臣屢有戰功刺爲亂欲乘我不備爲掩襲計給降太祖將納之命與欲穩嚴號令勅士卒控轡以防其變逆黨知有備懼而遁以功授右皮室詳穩典宿衛會侵燕趙遇唐兵雲碧店老古恃勇輕敵直犯其鋒戰久之被數創歸營而卒太祖深悼惜之次頗德字兀古鄰狀貌秀偉弱冠事太祖一見卽曰此子風骨異常他日必爲國器後果然天顯初爲左皮室詳穩典宿衛遷南院夸離董治政有聲勅兵援晉破張敬達軍石敬瑭圖晉安寨復領輕騎襲潞州塞其餉道唐諸將懼殺敬達以降拜北南院大王旣而加採訪使爲人強直不從舊制肅祖以下宗室稱院德祖號三父房稱橫帳百官子弟及籍沒人稱著帳太宗因耶律斜的言橫帳班列不可與北南院並詔在廷議別橫帳班列上頗德奏橫帳與諸族皆臣也始

橫帳見官制北南院大王爵位高品在惕隱上願與泰任茲又
必與同列何以令衆帝乃諭百官曰朕所不知卿等不宜面從
詔仍舊制統和二年爲南京統軍使四年敗宋軍於固安俘獲
甚衆賜檢校太師卒年四十九 撻烈字涅魯爽爲人沉厚多
智有任重才然不脩邊幅故無顯稱年四十未仕會同間爲邊
部令穩應曆初陞南院大王均賦役勸耕稼部人化之年穀屢
稔戶口豐殖朝議以爲富民大王與屋質俱有政迹周人侵漢
乞師任爲都統率西南道軍援之時已下太原數城漢人不敢
戰聞撻烈兵至周主遣郭從義尚鈞等率精騎拒於忻口撻烈
擊敗之獲其將史彥超周軍遁歸復所陷城邑漢主詣撻烈謝
及漢主殂宋師來伐上又命爲行軍都統發諸道兵救之旣出
鴈門宋謀知而退保寧元年加兼政事令致仕乾亨初復召見

鬚髮皓然精力猶健問以政事上厚禮之俄以疾薨年七十九
生平用兵賞罰信明得士卒心河東單弱不爲周宋所併者撻
烈有力焉。

耶律海里字涅刺昆遙輦喇古可汗之裔太祖傳位海里與有
佐命功同心匡輔時屬籍比局萌覬覦而遙輦故族尤觖望海
里多先帝知人之明又素服太祖威德獨歸心焉以故太祖託
爲耳目數從征討旣清內亂始置遙輦敵穩命海里領之天顯
初命將遙輦糾從征渤海破忽汗城師還卒四世孫阿沒里
字蒲鄰幼聰敏保寧中爲南院宣徽使統和初皇太后稱制與
耶律斜軫參預國論爲東路行軍都統以征高麗功遷北院宣
徽使加政事令二年奏討女直捷遣使執手獎諭四年從上親
征詔馳赴燕南與休哥議軍事拜南征都監以副之屢以破宋

軍七年夏四月命率兵分道備宋十二年行在多盜賴立禁捕
法盜始息嘗諫兄弟雖曰同胞賦性各異一行逆謀雖不與知
輒坐以法是刑及無辜也太后納其言自今雖同居兄弟不知
情者亦免連坐著爲令後致仕卒生平好聚歛每從征所掠人
口聚而建城請爲豐州就以家奴閻貴爲刺史時議鄙之子賢
哥左夸離畢

耶律敵刺字合魯隱遇輦解質可汗之子爲人善騎射頗好禮
文太祖踐阼知其忠實委以軍事兼掌禮儀以平內亂功代轄
里爲奚六部吐里卒 後裔弘古字盆訥隱統和初任軍事爲
拽刺詳穩尋徙南京統軍使十三年徇地南鄆克敵於四岳橋
斬首百餘級攻宋以戰功遷東京留守封楚國公副先鋒耶律
盆奴伐高麗擊破三水營擒康肇于銅州復從奴瓜討西北部

及典禁軍號令整肅諸部多降尋遷侍中卒

耶律欲穩字轄刺干與解里俱突呂不部人祖臺押遙輦時爲北邊搜刺簡獻皇后與諸子罹難嘗倚之以免太祖思其功不忘詔以配享廟庭 欲穩爲人嚴重有濟世志佐太祖有功命典司近部以遏諸族窺覲之意極見器重益感奮思報自創置護衛宮分卽率門客首以附籍益嘉其忠預平刺葛等亂以功遷奚迭刺部夸呂董從征渤海亦有功天顯初卒諸帝後因其故多取子孫爲友弘義宮分中稱八房皆其後也弟霞里終奚六部禿里 解里字潑單世爲小吏隸太宗麾下爲軍校天顯間唐攻陷定州爲兵所獲晉高祖立始歸國太宗賞其罪拜御史大夫會同九年命與降將張彥澤率騎兵三千疾趨河南所至摧陷無敢當其鋒旣入汴遷晉王重貴于開封府彥澤恣行

殺掠穢亂宮掖鮮里頗不能禁百姓騷然怨憤車駕至數彥澤
罪斬于市汴人大悅鮮里亦被詰責尋釋之天祿間加守太子
太傅應曆初世襲本部令穩卒

耶律鐸臻字敵董六院部人祖蒲古只遙輦時再爲本部夸离
董會狼德等旣害玄祖暴橫益肆賴以計誘其黨悉誅戮之鐸
臻與圖魯窘渥里思勃古哲合里只侯哂耶律吼皆其後也

鐸臻幼有志節太祖爲于越常居左右卽位後梁人遣使求轅
軸材因語太祖名爲求材實覘吾輕重宜答之曰凡材所生必
深山窮谷有神司之須白鼻赤驢禱祠然後可伐如此則其語
自塞已而果然天贊三年將伐渤海又諫若先從事恐西夏必
躡吾後請先西討庶無後顧憂太祖從之及淳欽皇后稱制惡
而囚之誓曰鐵鎖朽當釋汝旣而復召使者欲去鎖鐸臻辭曰

鐵未朽可釋乎后聞嘉歎趣召釋之天顯二年卒 仲弟古字

仲弟古字

涅刺昆初名霞馬葛嘗從太祖畧地山右及會李克用於雲州見其立侍語曰是兒骨相非常不宜使在左右自是頗忌之太祖方西討聞諸弟亂作知古不與喜曰吾無患矣趣召古議陳殄滅之策後皆如言以故錫賚甚厚神冊末南伐隸老古麾下與唐兵戰于雲碧店老古傷甚太祖疑古陰害之跪請及今見在遣使往問對以臣於古無可疑者上意乃釋卽以代爲右皮室詳穩卒後太祖時語左右古死猶長松自倒非吾伐之也季弟突呂不字鐸素勿聰敏嗜學事太祖甚見器重凡製契丹大字贊成居多授文班林牙領國子博士知制誥明年受詔撰決獄法太祖畧燕詔與皇太子及王郁攻定州師還至順州幽州馬步軍指揮使王千率衆來襲突呂不射躡其馬擒之天贊

二年命佐皇子堯骨爲副元帥既克平州進軍燕趙攻下曲陽
北平至易州其人來拒踰濠而陣李景章出降言城中人無鬪
志大元帥將修攻具諫曰我師遠來人馬疲憊勢不可久畱乃
止軍還太祖聞其謀大悅賜賚優渥車駕西征党項仍命爲先
鋒有功太祖犒師水精山大元帥東歸獨畱通西南部復討党
項多獲而還會東伐大譚譙降而復叛先登攻陷平之承詔銘
太祖功德于永興殿壁師已班所下州郡往往仍叛復從大元
帥攻破之淳欽皇后稱制有飛語中傷者后怒懼而亡匿太宗
知其無罪召還天顯三年討烏古部俘獲甚衆伐唐以爲左翼
攻降唐軍霞沙寨十一年送晉主石敬瑭入洛及大冊命總禮
儀事加特進檢校太尉會同五年卒

耶律圖魯審會同元年改北院大王嘗屏左右與議大事占對

合意從討石重貴杜重威擁十萬餘衆拒漳沱橋兩軍爭渡力
戰數日不得進帝患人馬疲倦問計將安出諸將請緩師爲後
圖帝然之圖魯窘厲色進曰臣愚竊以爲陛下樂於安逸則謹
守四境可也既欲擴大疆宇出師遠攻詎能無厯聖慮若中路
而止適爲賊利必陷南京奪屬邑爭戰未已吾民何日安枕况
彼步我騎漢人足力弱而行緩如選輕銳先絕其餉道則事蔑
有不濟帝喜而從之既而餉道塞數出師以牽挽其勢重威果
如言降以功獲賜甚厚明年春卒于軍 漚里思會同問太宗
伐晉至河而獵適游東青鵠搏雉晉人隔水以鵠引去上顧左
右曰誰爲我得此人漚里思請內廐馬濟河擒之并殺救者數
人還上大悅優加賞賚爲人負勇畧每戰被重鎧揮鐵槊所向
披靡長於料敵晉將杜重威在望都據水勒戰因介馬突陣餘

軍繼之陷入圍中衆言陣薄處可出自度或有他備竟引兵衝
堅而出廻視衆所指皆大塹也後坐總領敵烈皮室軍私免部
曲奪官卒 勃古哲字蒲奴隱爲人勇悍善治生保寧中爲天
德軍節度使歷南京侍衛馬步軍都指揮使以討平黨項羌阿
里撒米僕里斃米遷北院大王聖宗卽位首陳便宜數事稱太
后旨卽日命總領山西路諸州事統和四年宋將曹彬等侵燕
迎擊甚力特賜輸忠保節致主功臣令居奉聖州與節度使蒲
打里共裁決山西五州公事耶君曷魯只告其曲法虐民十七
罪詔橫帳太保按鞫有狀決大杖釋其罪八年復爲南京統軍
使卒子爰里官至詳穩 合里只字特滿重熙中累遷西南面
招討都監充宋國生辰使館于白溝驛宋宴勞優者嘲謔惠河
西之敗怒曰勝負兵家常事我嗣聖皇帝俘石重貴至今典中

有石家寨由此言之惠何足較宋人慚服帝聞之曰優伶失辭何可傷兩國交好決杖免官清寧初起爲懷化軍節度使七年入爲北院大王封幽國公歷遊興軍節度使東北路詳穩加兼侍中致仕卒爲人明達勤恪懷柔有道置諸賓館及西邊營田皆自其發之 侯哂字禿寧北院大王查只孫黃皮室詳穩忽古子初爲西南巡邊官以廉潔稱累遷南京統軍使尋爲北院大王重熙十一年党項部人多叛入西夏受詔巡西邊公河要地多建城堡以鎮之徙東京畱守十三年與知黃龍府蕭歐里斯將兵討蒲盧毛朶部有功加兼侍中致仕卒

耶律吼字曷魯爲人端慤好施不事生產太宗特加倚任會同六年爲南院大王蒞事精簡人不敢以年少易之奏晉主石重貴表不稱臣辭多倨慢不可不伐及帝親征命統所部兵從入

汴諸將皆取內帑珍異吼獨取馬鎧帝嘉之及帝崩于樂城無遺詔軍中憂懼不知所爲吼詣北院大王耶律注議曰天位不可一日曠若請于太后則必屬李胡其人暴戾殘忍詎能予民必欲厭人望則當立永康王注然之會安排意與吼合遂定議頃之以功加採訪使賜以寶貨辭曰臣位已高敢復求富臣從弟的琰諸子坐事籍沒陛下哀而出之則臣受賜多矣上曰吼舍重賞以族人爲請其賢遠甚許之仍賜官戶五十時有取當世名流作七賢傳者吼與其一天祿三年卒年三十九 子何魯不字斜寧穆宗時因父首議立世宗故不顯用晚年爲本族敵史及景宗卽位以平察割功受昭德軍節度使爲北院大王時黃龍府軍將燕頗殺守臣以叛何魯不討之破於鴨綠江坐不親追擊以至失賊杖之乾亨間卒 五世孫敵烈字撒懶爲

人寬厚好學工文詞重熙中補牌印郎君兼知起居注十三年
由北院樞密副使爲右丞離畢十五年轉左清寧元年稍遷永
州同知禁盜有功改北面林牙承旨以重元作亂赴援力戰平
之遷授臨海軍節度使十年徙武安州觀察使咸雍五年累遷
長寧宮使檢括戶部司乾州錢帛逋負立出納經畫法公私便
之太康四年爲南院大王秩滿部民請留遷南京留守同知有
疾上命乘傳赴闕遣太醫視之轉上京留守大安四年爲乙室
大王知西北路招討事改塌丹城節度使以疾致仕加兼侍中
賜一品俸八年卒

耶律屋質字敵筆系出孟父房爲人簡靜有器識重然諾遇事
造次處之從容人莫能測又博學知天文會同間爲惕隱太后
世宗兩兵相攻人皆恟恟相謂曰若果戰則是父子兄弟相夸

人心一搖國禍不淺時李胡盡執世宗臣僚家屬語守者曰我戰不克先殪此曹時屋質從太后世宗以其善籌因欲行間乃令設事奉書以試太后太后得書轉示屋質讀竟言曰太后佐太祖定天下故臣願竭死力若太后見疑臣雖欲盡忠得乎太后曰我若疑卿安肯以書示汝對曰太弟與永康王皆太祖子孫神器非移他族爲今之計莫若以言和解事必有成太后問誰可遣者對曰設不疑臣請往萬一見聽廟社之福太后乃遣屋質授書於王王遣耶律海思復書辭多不遜屋質因諫書意如此國家之憂方殷未艾臣願釋怨以安社稷王曰彼衆烏合安能敵我屋質曰卽不敵奈骨肉何況未知孰勝偕曰幸勝諸臣之族執於彼者無噍類矣以此計之惟和爲善左右聞者皆失色王讓之曰汝與朕屬尤近何反助李胡對曰臣以社稷至

重不可輕付故如是耳王良久復問曰若何而和對曰與太后
相見各紓悲念和之不難不然決戰非晚王然之遂遣海思詣
太后約和往返數日議乃定始相見怨言交讓太后復謂汝當
爲我妻之進曰太后與大王若能釋怨臣乃敢進說太后曰汝
第言之屋質借謁者尋執之語曰昔人皇王在何故立嗣聖太
后曰立嗣聖者太祖遺旨又語王曰大王何故擅立不稟尊親
世宗曰人皇王當立而不立我正常立屋質正色曰人皇王捨
父母而奔唐子道當如是耶大王見太后不少遜謝惟怨是尋
太后牽於偏愛託先帝遺命妄授神器如此何敢望和當速交
戰擲籌而退太后悔心已萌泣曰向太祖遭諸弟亂天下荼毒
瘡痍未復庸可再乎乃索籌一王又曰父不爲而子爲又誰咎
耶亦取籌而執左右感激大慟太后復謂屋質議多不決神器

竟誰歸屋質曰太后若授永康王順天令人亦復何疑李胡厲聲曰我在兀欲安得立屋質曰禮有世嫡不傳諸弟昔嗣聖之立尚以爲非况公暴戾殘忍人多怨讟萬口一辭願立永康王不可奪也太后顧謂李胡汝實自爲之乃許立世宗卽位益喜其忠天祿二年耶律石剌潛告天德蕭翰劉哥益都等爲亂屋質遽引入見白其事劉哥巧言倖免屋質奏當使與石剌對狀不可輒恕世宗令鞠之屋質率劍士往訊天德等伏罪三年又表列察割陰謀事上不聽五年爲右皮室詳穩聞察割弑帝有言衣紫者不可失屋質乃易衣而出亟遣人召諸王及喻禁衛長皮室等同力討賊遣弟冲迎壽安王旣至意尚猶豫勸曰大王嗣聖子萬一落賊手必不見容悔將何及王始悟諸將聞其言相繼而至遲明整兵出賊不意圍之遂誅察割亂旣平穆宗

卽位英語朕之性命質出卿手命知國事盡賜以逆黨財產星
質固辭應歷五年爲北院大王總山西事保寧初宋圍太原令
率兵往援至白馬嶺遣勁卒夜出間道疾馳駐太原西鳴鼓舉
火宋以爲大軍至懼而宵遁以功加于越四年漢劉繼元遣使
來貢致幣於星質帝命受之五年五月癸亥薨年五十七景宗
痛悼輟朝三日至道宗時庶子唐古乞銘父功始命耶律庶成
製文勒石上京崇孝寺立祠享祀以旌之 唐古字敵隱爲人
廉謹善屬文統和二十四年述其父安民治盜之法以進補小
將軍遷西南面巡檢歷豪州刺史唐古部詳穩殿立科條禁姦
民鬻馬於宋夏界因陳弭私販安邊境之要太后嘉之詔邊境
遵行著爲令又言朝議欲廣西南封域黑山之西綿亘數千里
戍置太遠卒有警急赴援不及非良策也從之西蕃來侵詔議

守禦計命勸督耕稼以給西軍口于腦胸河側是歲大熟明年
移屯鎮州凡十四稔積粟數十萬斛斗米數錢重熙間改隗衍
黨項部節度使四年上疏初時築可敦城以鎮西域諸部縱民
畜牧反招寇掠今欲復守故疆乞省罷戍役不報十四年爲右
夸离畢俄致仕卒年七十八

耶律安搏玄祖仲子巖木曾孫祖楚不魯本部夸离董父迭里
幼多疾太祖常加撫育神冊六年爲惕隱從討阻卜党項有功
天贊三年爲南院夸离董征渤海攻忽汗城俘斬甚衆坐議太
宗嗣位建言帝位宜先嫡長忤太后旨詔下獄以黨附東丹王
加以炮烙之刑不伏殺之籍其家安搏目幼若成人居喪哀毀
見者傷之太宗屢加慰諭曰此兒必爲令器旣長寡言笑重然
諾動遵繩矩事母至孝痛父死非罪未葬不預宴樂世宗居藩

尤加憐恤密自結納令直宿衛太宗崩於藥城諸將欲立世宗以李胡及壽安王在朝猶豫未決世宗密召問計勸以大王聰安寬恕人皇王之嫡長先帝雖有壽安天下屬意多在大王今若不斷後悔無及會有自京師來者安搏詐言李胡死傳報軍中皆以爲信又詣北南二大王計之汪間而遽起曰先帝嘗欲以永康王爲儲歟吾二人方議此事有我輩在孰敢不從但恐不自太后而立爲國家啟釁安搏曰大王旣知先帝欲以王爲儲副若稍緩則大事去矣況今天下甫定思得賢明人心樂附設立李胡如社稷何吼大是其言計始決乃整軍召諸將奉世宗卽位于太宗柩前帝立倚爲腹心總知宿衛太后問吾與汝有何隙安搏以父死爲對后意默然初置北院樞密使卽命爲之賜奴婢百口寵任無比政事皆取決焉然性太寬樂循苟簡

慕容縱恣不能制天祿末察割兵犯御幄不能討中外短之穆宗卽位以立世宗故不復委用應曆三年誣與朶撒葛謀亂繫獄死姪撒給左皮室詳穩

耶律洼字敵輦與休哥俱隋國王釋魯孫南院夸葛董綰思子少有器識人以公輔期之太祖時雖未授官常任以事太宗卽位爲惕隱天顯末帝授河東命爲先鋒敗張敬達會同中遷北院大王及伐晉復爲先鋒與梁漢璋戰於瀛州敗之太宗道崩南方州郡多叛士馬困乏軍中不知所爲洼與吼號令諸將有不從者律用軍法皆應曰諾世宗卽位賜宮戶五十拜于越卒年五十四 庶孫學古字乙辛隱頴悟好學工譯覲及詩保寧中補御蓋郎君乾亨初受詔往援南京始至我兵新敗宋勢益張城中民懷二心賴以討安反側隨宜備禦晝夜不懈戰却敵

人夜登城者圖遂解乃開門列陣四面鳴鼓居民大呼聲震天地旋有高梁之捷以功遙授保靜軍節度使爲南京馬步軍都指揮使二年伐宋令將漢軍改節彰國軍值南境未寧民思休息亟爲禁止寇掠復遇宋將潘美分道來侵城中兵寡命張虛幟雜丁黃爲疑兵適獨虎峪夜舉烽火遣人偵視見敵俘掠村野邀擊擒其將領還所掠物與美定約各守邊疆無相侵軼民獲安業以功爲惕隱卒弟烏不呂字留隱爲人嚴重有膂力善屬文統和伐宋屢任以軍事與文直不相能以其異籍嘗爲奴才文直訟于韓德讓笑而釋之後從蕭恆德伐蒲盧毛朶部以功爲東路統軍都監德讓薦其材可任統軍使必能鎮撫諸蕃太后從之加金紫崇祿大夫檢校太尉頃之弟國留以罪亡遂與其母俱下吏恐禍及其母陰使人給召國留送有司誅之

然後退歸田里以疾卒

耶律休哥字遜寧少有公輔器初從蕭幹討烏古室韋二叛部應曆末爲惕隱乾亨初宋圖南京帝命將五院軍往救遇敵于高粱河與斜軫分左右翼擊敗之追殺三十餘里斬首萬餘級身被三創明旦宋主遁以創不能騎輕車追至涿州不及而還至冬命率本部兵從韓匡嗣耶律沙伐宋以報圍城之役戰于滿城方陣宋人請降匡嗣信之休哥曰彼衆整而銳必不肯屈乃誘我耳宜嚴兵以待匡嗣不聽休哥引兵憑高而視須臾南兵大至鼓譟疾馳士卒棄旗鼓走遂敗績休哥整兵進擊敵乃却俄收所棄兵械全軍而還詔總南而戍兵爲北院大王車駕親征圖瓦橋關宋兵來救守將張師突圍出帝親督戰保哥斬師餘衆退走入城宋陣于水南將戰帝以休哥馬介獨貴慮爲

敵所識易賜玄甲白馬乃率精騎渡水擊敗宋軍追至莫州橫屍滿道數矢俱罄生獲數將以獻帝悅賜御馬金盃勞之曰爾勇過于名若人人如卿何憂不克師還拜干越聖宗初太后稱制命爲南面行軍都統以便宜從事因均戍兵立更休法勸農桑修武備邊境大治統和元年轉南京留守賜南面行營總管印綬總邊事命懇篤持送下車勝論燕民涿州刺史安吉奏宋築城河北詔引兵撓之遂不果城時宋多聚糧邊境聞宋主將如五臺山詔嚴爲備九月丙辰奏秋霖害稼請權停關征以通山西貿易從之四年宋將曹彬米信取涿州陷固安時北南院與奚部兵尚未至以力寡不敢出戰夜出輕騎殺其單弱以脅餘衆盡以精銳張其勢使彼勞於防禦以疲其力又設伏林莽絕其糧道卒困彬等伺退保白溝月餘復至亟引輕兵薄之擊

其離伍單出者且戰且却敵自救不服結方陣塹地兩邊而行凡四日始達于深適太后軍至益以銳卒追及之南軍力窮環糧車以自衛休哥圍之至夜彬信以數騎亡去餘衆悉潰追至易州東宋師尚數萬瀕沙河而麤促兵往擊之至則望塵奔竄蹂墜岸谷死者過半沙河爲之不流太后旋旆休哥收宋屍爲京觀封宋國王奏可乘勝畧地至河界詔爲儲器械備芻粟待秋大舉遣炮手西助斜軫秋復南征拜先鋒都統敗宋兵於望都遣人獻俘宋將劉廷讓並海出數萬騎聲言與李敬源合兵取燕先以兵扼其要地伺太后軍至接戰殺敬源廷讓走瀛州六年與蕭排押裏曷捉生將至易州遇宋兵殺其指揮使而還又遣詳穩意得里獻所獲宋謀者十月癸未進軍長城口擊敗宋定州守將李興追奔五六里十一月己酉復獻黃皮室詳

穩徇地莫州所獲馬匹士卒賜隸燕京西路又送降卒命給寒
衣十二月丙申又獻奚詳穩耶魯所獲宋謀七年宋復遣劉廷
讓等乘暑潦夾攻易州諸將懼之獨休哥率銳卒逆擊于沙河
之北殺傷數萬獲輜重不可計獻于太后嘉其有功免拜不名
賜以紅珠筋線命入內神帳行再生禮賜物甚厚自是宋人畏
之不敢北向至欲止兒啼輒曰于越休哥至矣七年引軍至滿
城招降卒七百餘人獻于朝以隸東京時燕民極弊爲省賦役
恤孤寡戒戍兵各無犯境有馬牛逸者悉還之遠近向化邊鄙
以寧十六年十二月丙戌薨是夕雨木冰訃聞帝與太后痛悼
輟朝五日詔立祠南京休哥生平智畧宏遠料敵如神每戰勝
讓功諸將故士卒樂爲之用身更百戰未嘗多殺無辜二十一
年子道士奴高九以謀反誅餘子高八官至節度使高十終于

越 孫馬哥字訛特懶興宗時以散職入見上問卿奉佛乎對
曰臣每旦誦太祖太宗及先臣遺訓未暇奉佛帝悅清寧中遷
唐古部節度使咸雍中累遷匡義軍節度使太康初致仕卒

耶律撒合字率懶乙室部人南府宰相歐禮斯子天祿間始仕
應曆中拜乙室大王兼知兵馬事乾亨初宋來侵詔以本部兵
守南京蕭討古敗獨全軍還諭以拒敵當如此後宜勉之不憂
不富貴知守太保統和間卒

耶律夸臘葛字蘇散本宮分人檢校太師合魯之子應曆初以
父任入侍爲殿前都點檢時上新卽位疑諸王有異志引以爲
布衣交一切機密事必與之謀遷寄班都知賜宮戶穆宗醢酒
數以細故殺人有監雉者因傷雉而亡獲之欲加誅夸臘葛諫
是罪不應死帝竟殺之以屍付曰收汝故人然終不爲止復有

監鹿詳穩亡一鹿下獄當死夸獵葛又諫人命至重豈可爲一獸殺之良久得免會秋獵違法廢岐角者惟天子得射上命夸獵葛射應弦而踏上大悅賜以金銀名馬及黑山東抹真之地數十里後坐穆宗被弑守衛不嚴被誅

耶律沙字安隱應曆間累官南府宰相景宗卽位總領南面邊事保寧間宋攻河東沙將兵救之有功加守太保九年十月甲子以党項降人可醜買友來見詔以可醜爲司徒買友爲太保各賜物遣之乾亨初宋復北侵沙將兵由間道至白馬嶺阻大澗遇敵沙與諸將欲待後軍至而戰翼王敵烈監軍抹只等以爲急擊之便沙不能奪敵烈等以先鋒渡澗未半爲宋人所擊兵潰抹只僅以身免敵烈及其子娃哥沙之子德里令穩都斂詳穩唐筭等五將俱沒會斜軫救兵至萬矢俱發敵軍始退沙

將趨太原以漢駙馬盧侵來奔言太原已陷勒兵而還宋乘銳
侵燕沙復與戰于高粱河稍却又遇休哥斜軫等邀擊宋軍敗
宋主問道而遁上命與抹只等俱以功釋前過是年復從韓匡
嗣伐宋敗於滿城帝欲誅之以皇后營救得免睿智皇后稱制
召賜几杖以優其老復從伐宋敗劉廷讓李敬源之軍賜賚優
渥統和六年卒 耶律抹只字留隱隋國王後初以皇族入侍
景宗擢爲林牙以幹給稱保寧間遷樞密副使滿城之敗獨抹
只部伍不亂徐整旗鼓而歸璽書褒諭改南海軍節度使乾亨
二年命權奚王引兵至南京營繕守備統和初爲東京留守兼
侍中二年八月奏女直未直賽里等八族內附詔納之四年
三月遣隨大軍繼進賜劔專殺四月令統諸軍赴行在與休哥
等逆戰宋將曹彬米信等于涿州東克之遷開遠軍節度使封

涿水郡王因奏今歲霜旱州民歲輸稅粟每斗舊折錢五今增爲六部貧民便之統和末卒

耶律善補字瑞昇與何魯掃古馬六化哥仁先俱孟父楚國王之後善補純謹有才智景宗授千牛衛大將軍遷大同軍節度使伐宋命爲南京統軍使由西路進聞韓匡嗣失利卽歛兵還乾亨末復戰滿城爲伏兵所圍斜軫救之獲免詔以失備大杖決罰統和初爲大內惕隱奏宋邊七十餘村來附詔存撫之四年帝與太后親征命以軍赴山西逆宋師擢都元帥懼不敢戰多陷嶺西州郡坐奪職俄因叔安端有匡輔功世宗愍之復徵爲南府宰相遷南院大王會再舉伐宋召衆將集議以魏城無備欲攻之善補曰攻固易然城大若克之士卒貪掠勢必難遏且傍多巨鎮各出援兵何以當之乃止生平性懦守靜凡征討

憚攻戰以故多不利年七十四卒 何魯掃古字烏古鄰重熙末補祇侯郎君清寧初加安州團練使太康中歷懷德軍節度使奚六部禿里太尉詔與樞密官指畫東北邊事改左護衛太保侍上言多率易察其無他故優貸之八年知西北路招討使事始因邊部來侵誘北阻卜酋豪磨古斯攻之俘獲甚衆以功加左僕射明年復討耶觀剗等誤擊磨古斯北阻卜由是叛命遣都監蕭張九往討不利二室韋拽刺與六院部特滿羣牧宮分等軍俱陷于敵坐不以實聞削官決以大杖壽隆間累遷東京留守加惕隱兼侍中賜保節功臣道宗崩與宰相耶律儼總山陵事乾統三年爲南院大王尋卒 馬六字惕隱爲人畏慎容物不臧不世務淡于榮利性寬和善諧謔親朋會遇一坐盡傾或有面相陵折者恬然若弗聞以故上益親狎與耶律弘古

爲刺血友薦補宿直官重熙初遷旗鼓刺詳穩三年遷崇德宮使五年爲惕隱七年拜北院宣徽使寵遇過宰相帝常呼之以兄十一年由西京畱守爲漢人行宮都部署改遼興軍節度使卒年七十子奴古達終南京宣徽使

耶律化哥字弘隱善騎射乾亨初爲北院林牙統和侵宋令統平州兵馬諜知敵山海路來襲卽先據平州要地事平拜上京畱守遷惕隱爲北院大王復侵宋爲先鋒破敵于遂城以功轉南院大王六年八月丙申與宋不姑春古里來貢尋改北院樞密使開泰元年代阻卜值棄輜重遁走俘獲甚多帝嘉其功封幽王命經畧西邊以西北路畧平畱兵戍守鎮州詔還闕旣而復命西討糧乏馬弱勢不可守乃益兵深入居翼只水破阻卜酋長烏八之衆徐以兵進蕃人望風奔潰獲羊馬及輜重路由

白拔烈遇阿薩蘭回鶻掠之都監裏里繼至始知其誤蓋此部
實効順者因悉還所俘諸蕃由此不附上使案之前王爵以待
中遙領大同軍節度使卒 弟弘古字胡篤董與聖宗嘗刺臂
血盟爲友禮遇尤異統和間累遷順義節度使入爲北面林牙
太平元年加同政事門下平章事出爲彰國軍節度使兼山北
道兵馬都部署徙武定軍節度使拜惕隱六年蕭惠將兵伐甘
州回鶻不克師還阻卜諸部皆叛與戰輒敗監軍涅里姑國舅
太保曷不呂死之詔遣與化哥等將兵往討有功拜南府宰相
改上京畱守重熙六年遷南院大王與馬六俱御製誥辭以寵
之十三年加于越訃聞上哭曰惜哉善人喪至親臨奠焉
耶律仁先字紇鄰小字查剌父瑰引興宗引爲刺血友至南府
宰相生三子仁先魁偉爽秀有智畧重熙三年補護衛帝與論

政才之自負以爲不世遇言無所隱授宿直將軍累遷殿前副
點檢改鶴刺唐古部節度使俄召爲北面林牙十一年陞北院
樞密副使使宋議十縣地曩者石晉報德木廟割以獻者周人
攘而取之是非利害灼然可見宋無辭以對定議歲增銀絹十
萬兩匹還遷南京留守同知十三年伐夏畱鎮邊未幾召爲契
川行宮都部署奏復王子班郎君及諸宮雜役十六年遷北院
大王從其奏兩院戶口殷庶詔免他部助役十八年再舉伐夏
與皇太弟重元爲前鋒遇蕭惠失利帝猶欲進兵仁先力諫乃
止後知北院樞密使遷東京畱守女直恃險侵掠不止奏乞開
山通道以控制之邊民安業封吳王清寧初拜南院樞密使化
哥諧之出爲南京兵馬副元帥守太尉更王隋六年復爲北院
大王御製誥文賜之民歡迎數百里如見父兄疑重元凶狠宜

早爲備其黨蕭胡觀等忌之請以爲西北路招討使道宗將從之乙辛奏乃先帝舊臣德冠一時不宜補外復拜南院樞密更王許七月從獵太子山重元謀逆帝趣往捕未及介馬已犯唯宮帝欲幸北南院止曰陛下若舍扈從而行賊必蹶其後且南北大王心未可知其子撻不也曰聖意豈可違乎仁先怒擊其首帝悟悉委以討賊事乃環車爲營折行馬作兵仗率官屬近侍三十餘騎陣柅外以五院部蕭塔刺所居最近亟召之分遣人集諸軍黎明賊又率奚人二千犯行宮塔刺兵適至仁先料賊勢不能久俟其氣沮攻之乃皆營而陣乘便奪擊賊衆奔潰追殺二十餘里重元與數騎遁去帝執仁先手曰平亂皆卿之功也加尚父進封宋王拜北院樞密使親製文以褒之詔畫藻河戰圖以旌其功咸雍元年加于越改封遼王與乙辛共事

抑其恃寵不法由是見忌出爲南京留守改王晉至則恤孤惻
禁姦惡宋聞風震服議者謂自休哥後一人而已會阻卜塔里
千坂領禁軍往討賜以鷹紐印及劍諭便宜從事仁先旣至嚴
斥候扼敵衝懷柔服從庶事整飭賊來逆擊追殺八十餘里大
軍繼至又敗之別部把里斯禿沒等來救見其屢挫不敢戰而
降北邊遂安八年五月薨年六十遣命家人薄葬 撻不也字
胡獨董清寧二年補祇候郎君累遷永興宮使以平重元亂遙
授忠正軍節度使賜定亂功臣殿前點檢同知歷高陽臨海二
軍節度使左皮室詳穩太康六年授西北路招討使率諸部首
長入朝加兼侍中時朝廷務姑息多擇柔愿者爲招討自蕭敵
祿後諸部漸至跋扈及是合容尤甚邊防益廢尋改西南而適
阻卜酋長磨古斯叛命代何魯掃古仍爲西北路招討磨古斯

之爲部長由其所薦遣人誘致之給以爲降信之以兵逆于鎮州西南沙磧間禁士卒無得妄動敵至裨將耶律綰斯徐烈見其勢銳不及戰而走遂被害年五十八贈兼侍中諡貞憫生平少謹愿後爲族嫠所惑出其妻終以無子人以此譏之

弟義先天性忠直美風姿舉止嚴重重熙初補祇候郎君班詳穩十三年車駕西征爲十二行紂都監戰功最多改南院宣徽使疾同樞蕭革席寵擅權因侍譙言于帝曰革校佞喜亂一朝大用必誤國家言甚激切不納他日復侍宴上命羣臣博義先常與革對辭曰臣縱不能進賢退不肖安能與國賊博哉帝止之曰卿醉矣猶厲聲不已上大怒賴皇后救得解自此鬱鬱不自得然議事未嘗少沮十六年爲殿前都檢點明年充行軍都部署副以夏行美耶律述者爲監軍討蒲奴里多所招降獲其

部長陶得里以歸遣使奏捷手詔褒獎以功改南京統軍使封武昌郡王奏請統軍司錢營息以贍貧民未期軍器完整民得休息二十一年拜惕隱戒其族人曰國家三父房皆帝之昆弟最爲貴族天下風化所自出凡諸不孝不義尤不可爲故其接下無貴賤賢否皆與均禮其妻晉國長公主之女亦以身率先每遇中表親非禮服不見內外多化之進王富春薨年四十二清寧間追贈許王弟信先以父故典宗幼養于宮旣長善騎射重熙十四年爲左護衛太保同知殿前點檢司事明年改漢人行宮都部署十八年兼右祇候郎君班詳穩上問所欲對曰先臣塊引與陛下分如同氣然不及王封儻使蒙恩地下臣願罪矣上曰此朕遺忘之過追封燕王是年從蕭惠伐夏敗于河南例被責清寧初爲南面林牙卒

耶律室魯字乙辛隱六院部人魁岸美容儀與聖宗同年生愛
之甫冠補祇候郎君未幾爲宿直官師出侵宋爲隊帥攻拔通
利軍加檢校太師奚王府監軍歷北南院大王和議成特進門
下平章事賜推誠竭節保義功臣以本部俸羊多闕人又空乏
請以羸老之羊及皮毛歲易南中絹彼此利之二十九年拜北
院樞密使封韓王自韓德讓知院職多廢曠室魯拜命朝野相
慶未幾從上獵松林至沙嶺卒年四十四贈守司徒政事令二
子十神奴南院大王 歐里思字畱隱少有大志未冠補祇候
郎君開泰初爲本部司徒秩滿閑居徵爲郎君班詳穩遷右皮
室將本部兵從蕭排押伐高麗茶陀之敗獨全軍還帝嘉賞終
西南面招討使

耶律世良小字幹六院部人才敏給練達國朝典故及世譜上

書與族弟敵烈爭嫡庶聖宗始識之韓德讓病薦以自代統和末爲北院大王開泰初因大冊禮加檢校太尉同政事門下平章事會西邊拒命擢爲都監與耶律化哥將兵往禦之明年化哥還將罷兵世良獨請益兵可克帝從之遂與化哥追至安貞河大捷而還自是邊境以寧論功封爲岐王拜北院樞密使三年命遷馬駝于烏古部會廸烈部人夸刺殺其渠長稍瓦而叛鄰八部皆應攻陷巨毋古城再命伐之密詔東京畱守善寧平章涅里袞總大軍及女直諸部兵分道而進世良率兵壓境至清泥壩大破之先時于厥旣平朝議內徙其衆于厥重遷遂叛世良懲創其事輒殲其丁壯勒兵渡曷刺河進擊餘黨其將勃括聚兵來擊我軍小却是夜勃括誘于厥之衆皆遁世良追之勃括輕騎遁去獲其輜重及所誘于厥之衆併遷廸烈得所獲

輅麥里部民城臚胸河上以居之獻俘獲數賞賚有功將士樞
密使貫寧奏詔侍御撒剌獎諭代行執手之禮四年并伐高麗
爲副部署都統劉愼行逗遛失期執還京師世良與都監蕭屈
烈進兵明年正月庚戌至北都護府破追兵于郭州西斬首數
萬級盡獲其輜重乙卯次南海以暴疾卒於軍

耶律盆奴字胡獨董惕隱涅魯古孫景宗時爲烏古部詳穩政
尚嚴急民苦之有司以聞詔諭盆奴任方面寄以細故究問恐
損威望尋遷馬羣太保統和十六年隱實燕軍之不任事者汰
之二十八年駕征高麗爲先鋒至銅州其將康肇分兵爲三以
抗我軍一營于州西據三水之會肇居其中一營近州之山一
附城而營盆奴率耶律弘古并的朶擊破之擒肇李玄蘊等軍
望風奔潰會大軍至斬三萬餘級追至開京破敵於西嶺邊城

不守王詢懼僞遁平州諸將入開京焚其王宮撫慰其民人上
嘉其功遷北院大王薨 的琫字耶寧與仙童俱仲父房之後
習兵事爲左皮室詳穩帝壯之曰以卿英才爲國戮力眞吾家
千里駒也賜以御馬及緇鎧明年爲北院大王出授烏古敵烈
部都詳穩年七十二卒 仙童重熙初爲宿直官累遷惕隱都
監以寬厚稱蒲奴里叛命爲五國節度使率師討之擒其帥陶
得里又擊烏古叛降其衆授左監門衛上將軍改彰國軍節度
使拜北院大王清寧二年知黃龍府事遷侍衛親軍馬步軍都
指揮歷忠順武定二軍節度使致仕封將國公咸雍初徙封許
國公卒

耶律題子字勝隱北府宰相兀里之孫爲人善射工畫遇敵將
有因傷而仆者繪其狀以示敵人咸嗟神妙保寧間爲御蓋郎

若九年奉使于漢具言兩國通好長久之計劉繼元深加禮重
統和二年將兵與西邊詳穩耶律速撒討陀羅斤大破之復從
斜軫擒楊繼業論功居最又敗賀令圖於定安授西南面招討
都監聞宋兵守蔚州急召外援夜伏兵道傍黎明授兵果至行
過未半而擊之城中軍出復爲斜軫所邀兩軍俱敗奔于飛狐
地隘不得進殺傷甚衆令圖復集敗卒來襲蔚州題子遼戰復
破之應州守將自遁進圍寰州冒矢石登城宋軍大潰是冬復
與蕭撻凜由東路擊宋俘獲甚衆後聞宋兵屯易州率兵逆之
至易境而卒

耶律八哥字烏古鄰五院部人幼聰慧書一覽輒成誦統和中
以世業爲本部吏未幾陞開撒拔尋轉樞密院侍御扈從車駕
禦宋將曹彬米信有功擢上京畱守開泰四年召爲北院樞密

副使奏渤海承奉官宜有以統領之上從其言置都知押班七年命與蕭排押帥師伐高麗以爲都監至開京大掠而還濟茶陀二河高麗追兵至諸將欲伺渡河擊之獨持不可曰敵若渡河必殊死戰乃危道也不若擊於兩河之間排押從之戰敗績坐削使相降西北路都監復起畱守東京奏黃勗領兵入女直界徇地俘獲人馬牛畜不可勝計得降戶二百七十詔獎諭之未幾卒

耶律瑤質字振里董積慶宮人室韋部節度使侯古之子篤學廉介有經世志統和十年累遷至積慶宮使聖宗聞其正直特進用之諭以國有利害宜無所隱凡所陳請多見嘉納從征高麗破康肇軍其力爲多王詢一戰而敗遽求納款上名羣臣議皆謂宜納瑤質獨言其詐納之恐墮姦計待其勢窮力屈亦未

爲晚已而詢果趙清野無所獲其衆阻險而壘攻之不下瑤質以計降之擢拜四蕃部詳穩時招討使耶律頗的爲總管理質恥居其下上表臣先朝舊臣今既垂老乞還新命覲得常侍左右帝曰朕不使汝久處是任且命無隸招討得專奏事到部戢暴懷善政績顯著尋卒于官

耶律古昱字磨魯董突呂不四世孫有膂力工馳射開泰間爲烏古敵烈部都監會部人叛從樞密世良討平之以功授左千牛衛上將軍詔鎮撫西北部教以種樹畜牧不數年民多富實中京盜起命爲巡邏使悉擒之太平七年擢爲北院大王上親征渤海將黃皮室軍有破敵功累遷御史中丞尋授開遠軍節度使徙鎮歸德二十一年改天成軍節度使卒于官時年七十贈同中書門下平章事 子二宜新重熙間從蕭惠討西夏惠

敗績獨全軍拜北院大王知北院樞密使事咸熙九年爲中京
畱守卒 兀沒太康三年爲漢人行宮副都署乙辛誣害太子
詞連及帝釋之復奏與蕭楊九私議宮臺事被害乾統間贈同
中書門下平章事

耶律和尚字特抹與特麼俱出季父房重熙初補祇候郎君時
帝篤于親親凡三父之後皆序父兄行第於和尚尤狎愛素善
滑稽然每侍宴飲未嘗有一言之過由是上益重之歷積慶宮
使永興宮都部署同知南院宣徽使事南面林牙十六年出爲
懷化軍節度使俄召爲御史大夫二十三年大冊加天平軍節
度使檢校太師徙中京路案問使卒生平雅有美行數以財恤
親友人皆愛重然嗜酒不事事以故不獲柄用或以爲言答曰
吾非不知顧人生如風燈石火不飲將何爲晚年沈湎尤甚人
私竊錄

稱爲酒仙 特麼重熙間爲北剋累遷六部禿里太尉太安四年爲倒撻嶺節度使頃之爲禁軍都監是冬討磨古斯斬首二千餘級十年復討之旣捷授南院宣徽使壽隆元年爲北院大王四年知黃龍府事卒

孩里字胡輦回鶻人其先在太祖時來貢願畱因任用之重熙間歷近侍長清寧九年討重元有功加金吾衛上將軍賜平亂功臣累遷殿前都點檢宿衛以嚴肅稱太康初加守太子太保二年加同中書門下平章事三年改同知南院宣徽使事乙辛山守中京尋議復召陳其不可乙辛再入出爲廣利軍節度使皇太子被誣孩里當連坐有詔勿問大安初歷品達魯訛部節度使生平素信浮圖壽隆五年有疾邾醫藥自言吾數已盡清寧初從上獵墮馬憤而復蘇言見二人引至一城宮室宏敞有

衣絳袍入坐殿上左右列侍導以升階持牘者示之曰本取大
腹骨欲誤執汝牘上書官至使相壽七十七須臾遣還擠之大
壑而歸道宗聞之命書其事後果驗

耶律玠字吾展與適祿俱遙輦鮮質可汗之後重熙初召修國
史補符寶郎累遷知北院副部署事入見太后顧左右曰先皇
謂玠必爲偉人果然除樞密副使出爲西南面招討都監歷同
簽南京畱守事召爲南面林牙俄佐皇弟秦國王同知遼興軍
節度使事在職多所匡正咸雍初兼北院副部署復佐秦國王
爲西京畱守同知歲中獄空者三召爲孟父房敞隱生平不喜
貨殖帝知其貧賜宮戶時西北諸部久不能平遣決問狀至則
執弛慢者痛繩之尋以酒疾卒 適祿字散懶清寧初爲本班
郎君稍遷宿直官乾統中從伐阻卜有功加奉宸歷護衛太保

改弘義宮副使時上京梟賊趙鍾哥跋扈自肆適祿擒之加奉
州觀察使爲達魯斡部節度使天慶中知興中府加金吾衛上
將軍爲盜所殺

耶律石柳字酬宛六院部人南院大王獨攬孫統軍副使安十
子性剛直有經世志始爲牌印郎君太康初改爲离畢郎君每
聞乙辛斥忠賢進奸黨心切惡之反被誣害流于鎮州天祚初
卽位召爲御史中丞上書臣聞恩賞明則賢者勸刑罰當則姦
人消二者旣舉天下不勞而治臣前爲姦臣所陷斥竄邊郡幸
蒙召川不敢隱默臣見乙辛身出寒微位居樞要竊權肆惡不
可名狀蔽先帝之明誣陷順聖構害忠讜敗國罔上自古所無
賴廟社之休陛下發纂成業積年之冤一旦洗雪正陛下英斷
克成孝道之秋如蕭得裏特實姦黨之首耶律合魯不爲早辨

賴陛下之明。遂正其事。羣臣見陛下多疑。故各懷顧忌。不切推
問乙辛在先帝朝權寵無比。先帝若以順考爲實。則乙辛爲功。
臣陛下豈得立耶。先帝黜逐嬖后。詔陛下在左右。是亦悔前非
也。陛下詎可忘父讐不報。寬逆黨不誅。今靈骨未獲而求之不
切。傳曰聖人之德無加于孝。昔唐德宗因亂失母。思慕悲傷。孝
道益著。周公誅飛廉惡來。天下大悅。今逆黨未除。大冤不報。上
無以慰順考之靈。下無以釋天下之憤。怨氣上結。水旱爲沴。臣
願陛下下明詔求順考之瘞所。盡收逆黨以正邦憲。快四方忠
義之心。昭國家賞罰之用。然後致治之道可得而舉矣。謹別錄
順聖升遐及乙辛等事。昧死以聞。書奏不報。聞者莫不歎惋。石
柳乾統中。遙授靜江軍節度使。卒子馬哥同中書門下平章事。
舊史論曰。易言履霜。堅冰至。謹始也。使道宗能從嚴辭。撤刺之

諫后何得而誣。太子何得而廢。皇孫亦不至遽立。遽之爲國。未知其何如也。人徒知兀納擁祐皇孫之功。而不知天祚之立。目前徒見其好以漸不覺其非。卒以敗亡。豈不哀哉。觀於石柳之書。蓋可見矣。

耶律引吉字阿括。品部人。父雙古鎮。西邊二十餘年。治尚嚴肅。不殖貨利。時多稱之。引吉寅畏好義。以廕補官。累遷東京副留守。北樞密院侍御。值蕭革蕭圖古辭等以佞見任。鬻爵納賄。獨秉直道。處其間。無所阿唯。未幾改客省使。會朝廷遣使括三京隱戶。不得以命。引吉得數千餘戶。昭懷太子知北南院事。懇爲輔導。樞密乙辛將領太子惡其在側。奏出之。爲羣牧林牙。太康元年。奏止乙辛請賜牧地。目今方患補陋畜不蕃息。豈可分賜臣下。由是益嫉之。除懷德軍節度使。徙漠北。稍水馬羣。太保卒。

耶律幹特刺字乙辛隱實底石六世孫少不喜官祿年四十一始補本班郎君值樞密乙辛擅權讒害忠良恐禍及深自抑畏太康中爲宿直官歷左右護衛太保大安元年升燕王傳二年知樞密院事轉左丞四年改北院樞密副使帝賜詩褒獎遷知北院樞密使事賜翼聖佐義功臣會北阻卜部長磨古斯叛命率兵進討時天大雪敗其四別部斬首千餘級拜西北路招討使封溱水郡王加賜宣力守正功臣入爲南府宰相復討闡古胡里扒部破之擢契丹行宮都部署先時北南府有訟各州府得就按之比歲非奉樞府檄不得鞫問以故訟者稽留奏請如舊從之五年討耶覲剌部復爲西北路招討使兼禁軍都統俘斬甚衆獲馬馳牛羊各數萬明年擒磨古斯加守太保賜奉國匡化功臣乾統二年又獻耶覲剌等部捷阻卜來侵復戰

敗之俄罷招討歷除南院樞密使改北院封混同郡王加守太師賜推誠贊治功臣致仕卒諡曰敬肅

耶律棠古字蒲速宛六院郎君葛刺之後太康中補本班郎君累遷至大將軍性強毅率直好別白黑人有不善必盡言無隱在朝數論宰相得失由是久不得調後出爲西北戍長乾統三年后族蕭得里底招討西北路慢侮僚吏怒其不屈罷之天慶初敵烈叛召拜烏古部節度使至卽諭降叛者出私財發富民饋以振困乏部民大悅加鎮國上將軍及得里底與金人戰敗嶺棠古上書臣雖老願爲國破敵若得里底者請以軍法論不納保大元年致仕明年天祚出奔謁於倒塌嶺見上流涕慰而止之復令鎮烏古部敵烈以五千人來攻率家奴擊破之加太子太傅年七十二卒

弘簡錄卷二百九

載記 遼世戚

蕭敵魯

子幹臣計古弟阿古只附發京篤

蕭思溫

先繼

蕭海瑤

子圖

蕭塔刺葛

蕭護忍

蕭排押

弟恒德子匹敵附耶律幹順和朔奴

蕭朴

合卓

蕭挺凜

觀音奴附

蕭孝穆

子阿剌敏入弟孝先孝忠孝友姪得里底

蕭柳

蕭惠

弟虛列姪慈氏奴附耶律諧理

蕭敵烈

弟拔刺

蕭蒲奴

蕭特末

兄和尚

蕭韓家奴

蕭德

蕭惟信

父高

蕭樂音奴

子陽

蕭滴冽

蕭朮哲

姪藥阿

蕭烏野

蕭韓家

附常哥

蕭迂魯

弟鐸盧幹

蕭塔烈葛

附素楓謀魯幹

蕭兀納

附陶

蕭陶蘇幹

附耶律大悲奴

蕭奪刺

父賊

蕭阿魯帶

蕭敵魯字敵輦本契丹大族號阿鉢無姓氏以淳欽皇后女兄母卽德祖女弟與遼世爲婚姻五世祖曰胡母里世爲決獄官遥輦時嘗使唐畱之幽州敵魯性寬厚膂力絕人練習兵事太祖居潛與蕭痕篤同隸帳下日侍左右凡征討二人必與行陣卽位與弟阿古只俱總心腹部充宿衛拜北府宰相仍世其官從征奚及畱守光攻城畧地殺獲甚衆刺葛之亂潰而北走敵魯率輕騎與阿古只兼晝夜追之行至榆河敗其黨獲刺葛以獻太祖嘉之錫賚甚渥後討西南夸兄弟功先諸將神冊三年十二月卒敵魯有膽畧敵所在卽馳赴親冒矢石前後戰未嘗少衄必勝乃止以故在功臣列喻以爲手 子幹字婆典小字項烈性質直不爲阿附察割之亂與其黨胡古只善使人召

之不從縛其人送壽安王穆宗立嘉其忠蓋拜羣牧都林牙以
伐烏古有功遷北府宰相改突呂不部節度使高粱河之戰耶
律沙退走幹與休哥等併力捷之上手勅慰勞自是每征伐必
參決軍事尋加政事令宋兵圍瓦橋夜襲我營幹及耶律勻骨
戰却之廢智皇后以父呼幹及爲皇太后幹數條奏便宜多見
聽用統和四年卒 姪討古字括寧性忠簡應曆初始入侍郎
與耶律阿列審告海思與冀王敵烈謀反上嘉其忠詔尚朴護
公主保寧末爲南京統軍使侵燕之役初後奚底拒之不克軍
潰討古等不復敢戰退屯清河帝聞遣使責以偵候不嚴用兵
無法遇敵卽敗奚以將爲討古懼會援兵至奮力以戰復敗宋
軍上釋其罪降爲南京侍衛親軍都指揮使乾亨四年卒 阿
占只字撒本少卓越自放不羈長驍勇善射臨敵敢前每射洞

貫甲楯太祖爲于越以材勇充任使刺葛亂淳欽皇后軍黑山阻險自固太祖命統百騎往衛逆黨迭里特滑哥素憚其勇畧相戒不可犯神冊初徇下山西諸郡縣復敗周德威軍三年代兄爲北府宰相天贊初與王郁畧地燕趙破磁窯鎮太祖西征悉諉以南面邊事攻渤海獨將五百騎敗老相軍三萬會已降郡縣復叛盜賊蜂起與康默記往討所向披靡賊游騎七千自鴨渌府來援勢張甚帥其麾下精銳直犯敵鋒一戰克之斬馘二千餘復與默記進軍破回跋城以病卒功臣中太祖喻以爲耳子安國官至右皮室詳穩 蕭浪篤字元里軫其先相遇輩氏爲迭刺部人少慷慨以才能自任事親盡孝爲政尚寬簡旣踐阼除北府宰相

蕭思溫小字寅古敵魯族弟忽沒里之子少通書史太宗時爲

奚禿里太尉尚燕國公主拜駙馬都尉爲羣牧都林牙在軍中
多修邊幅僚佐言非將帥才尋改南京留守周人攻揚州遣領
兵躡其後憚暑不敢進拔緣邊數城而還後周師來侵圍馮母
鎮勢張甚請帝益兵報曰敵來則與統軍司併兵拒之敵去則
務農作勿勞士馬會敵入東城我軍退渡渚沱而屯思溫勸兵
徐行周軍數日不動與諸將議敵衆而銳戰恐不利且有後患
不如頓兵以老其師躡而擊之可以必勝諸將從之俄周人引
退思溫亦還已而周主復北侵與其將傅元卿李崇進等分道
並進圍瀛州陷三關垂迫固安思溫計無所出但云車駕旦夕
至麾下士奮躍請戰不從已而陷易瀛莫等州人皆震駭自以
邊防失利恐朝廷罪已表請親征退兵至益津會周主榮以病
歸燕民始安乃命班師還拜侍中穆宗被弑士論罪以審賊預

政無所匡輔保寧初以立景宗擢北院樞密使兼北府宰相仍
命世預其選冊其女爲皇后加封祖韓王父尚書令封魏王伯
胡魯古兼政事令尼古只兼侍中從帝獵間山爲賊所害 姪
繼先字惕隱小字雷只哥幼穎悟思溫命爲已子睿智皇后尤
愛之乾亨初尚齊國公主拜駙馬都尉統和四年宋人來侵繼
先率遼騎逆境上多所俘獲上嘉之拜北府宰相自是出師必
將本府兵先驅從拔狼山石堡破宋軍應州復從南征取通利
軍屢稱捷力未嘗失利親征高麗命雷守上京卒年五十八生
平名重戚里雖處富貴崇尚儉素所至以善治稱

蕭海瑑字寅的哂其先遙輦氏時爲本部夸葛董父塔列天顯
間爲本部令穩海瑑狀貌魁偉膂力過人天祿間娶明王安端
女萬因翁主應曆初察割亂萬因連坐繼娶嘲瑰翁主上以近

賜嘉其勤篤命預北府宰相之選既又總知軍國事時諸王多
反逆海環獨廉謹達政體每被命案獄多得其情人無冤者由
是知名漢主劉永鈞每遣使入貢必別致幣物詔許受之年五
十卒帝愍悼輟朝二日罷重五宴 子圖玉字元衍統和初以
戚屬入侍皇太后尋爲烏古部都監討速母縷等部有功遷烏
古部節度使十九年總領西北路軍事後以本路兵伐甘州降
其渠長牙懶旣而牙懶復叛命討之克肅州盡俘其民詔脩土
隄口故城以實之師還尚金鄉公主賽哥拜駙馬都尉加同政
事令門下平章事二十五年除爲西北路招討使往討阻卜破
之上言阻卜今已服化宜各分部治以節度使上從之二十六
年復討甘州回鶻降其王耶刺里撫慰而還自後節度使往往
非材部民怨而思叛開泰元年七月石烈太師阿里底殺其節
使

度使西奔窩魯朶城卽古所謂龍庭單于城也已而阻卜復叛
圖可敦城其勢甚張國王使諸軍齊射却之屯于窩魯朶城會
耶律化哥引兵來援遣人誘降諸部帝以始雖失計後得人心
釋之命仍領諸部復請益軍詔讓以叛者旣服兵安用益且前
日之役死傷甚衆若從汝謀邊事何時而息遂止六年二月甲
戌公主坐殺無罪家婢降封郡主以圖玉不能齊家罷使相尋
起爲烏古敵烈部詳穩以老代還卒子雙古南京統軍使孫說
篤幹尚三韓郡王合魯之女骨洛公主終烏古敵烈部統軍使
以善戰名于世

蕭塔剌葛字陶晒六院部人素剛直太祖時坐叔祖臺晒謀殺
釋魯沒入弘義宮世宗卽位以舅氏故出其籍補國舅別部敵
史時泰寧王察割有無君心目侍宴酒酣捉其耳強飲之曰上

聞知汝做狠然以國屬曲加矜憫使汝得在左右且度汝才何能爲縱忍行不義人孰肯從若長惡不悛徒自取赤族之禍察制不能答強笑曰何歲之虐也天祿未任北府宰相察制果作亂竟爲所害

蕭護思字延寧世爲北院使有才幹累遷御史中丞總典羣牧部籍應曆初遷左客省使未幾拜御史大夫詔窮治諸王反獄事多稱旨改北院樞密使仍命世預宰相選辭曰臣子孫賢否未知得一客省使足矣從之上晚歲酗酒用刑多濫護思居要地躡躡自保未嘗一言匡救議者以是少之年五十七卒

蕭排押字韓隱與朴俱國舅少父房之後爲人多智畧能騎射統和初爲左皮室詳穩討阻卜有功又破宋將曹彬米信兵于望都凡軍事有疑每預叅決尋總永興宮分紂及舍利拽刺二

皮室等軍與斜軫收復山西所陷城邑是冬攻宋隸先鋒圍蒲城率所部先登拔之獻所獲宋謀二人各賜衣物令還招諭攻南京統軍使尚衛國公主拜駙馬都尉加同政事門下平章事七年六月復與休哥破宋軍于泰州十三年歷北南院宣徽使條上時政得失及賦役法上嘉納焉十五年加政事令遷東京留守二十二年復攻宋將渤海軍下德清軍獲宋魏府官吏田逢吉郭守素常顯劉綽等以獻後蕭撻懶卒專任南面事宋和議成爲北府宰相二十八年征高麗拜爲都統北面林牙僧奴爲都監將兵由北道進至奴古達嶺遇敵敗之入開京大掠而還帝嘉之封蘭陵郡王開泰二年知西南面招討使事五年進王東平爲政寬裕善斷諸部長愛民以殷富時議多之七年再伐高麗命爲都統副以殿前都點檢蕭虛列至開京敵奔潰復

縱兵俘掠而還渡茶陀二河敵夾射排押委甲伐走天雲右皮
室二軍溺死甚衆坐免官太平三年復爲西南而都招討改王
幽薨弟恆德字遜寧素有膽畧善謀統和元年尚越國公主
拜駙馬都尉遷南面林牙從宣徽耶律阿沒里征高麗還改北
面林牙與休哥拒宋將曹彬米信叅議軍事多見信用擢爲東
京留守六年侵宋圍沙堆恆德獨當一面城上矢石如雨意氣
自若督將士奪其卑城陷中流矢太后親臨視賜藥攻長城口
復先登益多其功十一年詔與蕭撻燕伐高麗拔其邊城王始
懼上表請降稱臣奉貢明年八月賜號啟聖竭力功臣從奚和
朔奴討兀惹不能拔欲深入大掠都監耶律幹臘恐所得不償
所失止之不從後果道遠糧絕死傷士馬恆德削功臣號惟幹
臘得免十四年復爲行軍都部署伐蒲盧毛朶部還適公主有

疾太后遣宮人賢釋侍而私之公主悲乃薨太后怒賜死後追封蘭陵郡王子匹敵字蘇隱一名昌裔生未彌月父母俱死仁德后有子禁掖既長尚泰晉公主拜駙馬都尉爲殿前副點檢統和八年改北面林牙太平四年遷都點檢出爲國舅詳穩明年除契丹行官都部署大延琳叛以其治近先率本管及家兵據其要害以絕西渡之計分兵西取瀋州節度使蕭王六初至其副張傑紿言欲降已而有備攻之不克事平以功封蘭陵郡王聖宗不豫欽哀與仁德有隙忌后嘗愛匹敵令護衛馮家奴誣告其弟泥卜當仁德攝政徐議當立者公主竊聞其謀令奔女直國以全其生匹敵曰朝廷詎肯以飛語害忠良寧死弗適他國遂賜死幹臘字斯寧奚迭刺部人趨捷有力善騎射保寧初補護衛車駕獵頡山帝射中豪猪自叢莽突出御者托

滿捨轡而避廐人鶴骨翼之幹牖一箭而斃帝嘉賞及獵赤山有奔鹿奮角突前犯蹕路隘不容避復以身當之鹿觸而顛時帝兩瀕于危賴以獲免遷護衛太保後從斜軫破楊繼業有功統和十三年爲行軍都監尋加同政事門下平章事爲東京留守開泰中卒和剌奴字彝寧奚可汗之裔保寧中爲奚六部長統和初命佐休哥爲南面行軍副部署四年破宋兵于燕南手詔褒美軍還怙權擿無罪人李浩至死上以其功釋之六年南征復將本部軍由別道進擊狼山俘獲甚衆十月丙子遣人奏捷辛巳復奏敗宋兵于益津開八年上表欲復太宗舊制奚六部二宰相二常袞左右副常袞總知部長五房族屬宰相匡輔部長建明善事從之十三年秋遷都部署兀惹烏昭度渤海燕頗等侵鐵驪詔往討駐兵鐵驪秣馬數月進至城下昭度請

降有詔撫諭利其俘掠不許下令急攻城中大恐昭度率衆死守依埤堦虛構戰柵誘我軍登陴俄撤支柱登者盡覆和朔奴知不能克從副部署蕭恆德議以彼徭疆吾奉詔來討無功而還諸部謂我何若深入多獲猶勝徒返和朔奴不得已掠地東南循高麗北界而還以地遠糧絕士馬死傷詔降封爵卒子烏也郎君班詳穩

蕭朴字延寧父勞古善屬文爲聖宗詩友朴幼如老成人及長博學多智開泰初補牌印郎君爲南院承旨權知轉運事尋改南面林牙帝問以政朴具陳百姓疾苦國用豐耗帝悅以爲得人擢左夸商畢兼知樞密院事以酒廢事出爲典國軍節度使太平三年守太子太傅明年拜北府宰相以問蕭合卓疾執其手曰吾死君必爲樞使慎勿舉勝已者朴出而鄙之旣而果遷

北院樞密使時太平日久帝爾心翰墨始書諸牒以別嫡庶由是爭訟紛起朴有吏才能知人主意敷奏稱旨朝議多取決之俄封蘭陵郡王進恆王加中書令大延琳叛詔安撫東京以便宜從事興宗卽位皇太后稱制國事一委弟孝先方仁德皇后被誣朴屢言其冤不報每念至此爲之嘔血重熙初改韓王爾守東京及欽哀徙慶州朴進楚王升南院樞密使四年徙魏王薨年五十贈齊王子鐸刺國舅詳穩 蕭合卓字合魯隱突呂不部人始爲本部吏統和初以謹恪補南院侍郎十八年樞密韓德讓舉爲中丞以太后遺物使宋還遷北院樞密副使開泰三年爲左丞薨畢久居近職明習典故善古對以是被寵渥陞北院樞密使曷魯寧爲副使時議以爲無完行不可大用帝頗不悅六年伐高麗命爲都統王繼忠副之蕭屈烈爲都監賜以

劓俾得專殺不克而還時求進者多附之然其服食僕馬不加于舊帝知其廉以族屬女妻其子詔許親友傾獻豪貴奔趨于門太平五年有疾帝欲臨視辭曰臣無狀猥蒙重任今形容毀瘁恐陛下見而動心帝從之是日卒子烏古終本部節度使蕭撻懶字馳寧思溫再從姪父朮魯列善相馬應曆間爲馬羣侍中撻懶幼敦厚有才畧通天文保寧初爲宿直官累任契丹統和四年除諸軍副部署從斜軫擒楊繼業敗南院都監從駕南征攻沙堆力戰被剄太后親臨撫視明年加右監門衛上將軍檢校太師遙授彰德軍節度使來朝賜賚甚厚爲東征女直行軍都統與菩薩奴上所經地里物產又與軍將耶律謀魯姑上所俘獲皆遣近侍執手撫諭賜酒果以勞之十二年夏人梗邊授阻卜都詳穩從皇太妃總烏古及永興官分軍討之凡軍

中號令太妃並以委之誘叛帥阿魯敦等六十人斬之師還以
功加贈侍中封蘭陵郡王十五年敵烈八部人叛殺詳穩遁于
西北荒命將輕騎追擊祇獲其半因討阻卜之未服者諸蕃歲
貢方物往來如一捷奏賜詩嘉獎仍命林牙耶律昭作賦以述
其功時諸部叛服不常上表乞建三城以絕邊患從之俄召爲
南京統軍使二十年復伐宋以觀音奴爲先鋒擒宋將王先知
破其軍于遂城并下祁州與德清軍又勝于秦州手詔獎諭進
至瀋淵宋主軍北城未接戰提凜按視地形取宋之羊觀鹽堆
鳧屬中伏弩卒太后哭之慟輟朝五日子睦古南京統軍使爲
契丹行官都部署 蕭觀音奴字耶寧奚王搭統之孫統和十
二年爲右祇候郎君班詳穩遷奚六部大王奏罷休秩外給犂
鹿百數取於民者俄以伐宋功上加優賞終同知南院事 舊

史論曰宋乘下太原之銳以師圍燕繼遣曹彬楊繼業等分道來伐是兩役也遼亦岌岌乎殆哉自休哥奮擊于高粱宋兵奔潰斜軫擒業于朔州故地旋復宋自是不復深入社稷因而邊境寧最後撻懶統軍直抵澶淵一弩而中我軍失倚和議始定或者天厭其亂使南北之民休息者耶

蕭孝穆小字胡獨董與柳并惠俱淳欽皇后弟阿古只五世孫國舅詳穩陶琬之子統和二十八年累遷西北路招討都監開泰初遷授建雄軍節度使加檢校太保擊走朮烈等變爲西北路招討使進軍可敦城阻卜結五羣牧長查刺阿祝等謀中外相應悉誅之廼嚴備禦以待餘黨遂潰以功遷九水諸部安撫使三年拜北府宰相賜號忠穆熙朝功臣檢校太師同政事門下平章事太平二年知樞密院事充漢人行宮都部署三年封

燕王爲南京留守兼兵馬都總管八年詔於拒馬河接宋境上
置戍長巡九年討大延琳命爲都統戰于蒲水中軍稍却副部
署蕭匹敵都監蕭蒲奴以兩翼夾擊賊潰追敗之于手山北延
琳走入城深溝自衛孝穆欲全城降去城四面各五里築重城
起樓櫓使內外不相通城中撤屋以焚其將楊詳世等密送款
遂擒延琳以降凱還戎服見上各加宴勞改封東平郡王留守
東京賜佐國功臣爲政務寬簡撫納流徙其民安之興宗卽位
徙王秦尋復留守南京重熙六年進封吳國王拜北院樞密使
八年表請籍天下戶口以均徭役又陳諸部及舍利軍利害從
之政賦稍平人以爲悅閏十二月有疾車駕臨視九年徙王楚
時天下無事戶口蕃息上富于春秋每言及周取十縣慨然有
南伐之志羣臣多順旨上意已決孝穆諫曰昔太祖南伐終以

無功嗣聖仆唐立晉長驅入汴鑿馭始旋反來侵軼自後連兵二十餘年僅得和好烝民樂業南北相通今國家比之曩日雖曰富強然勲臣宿將往往物故且宋人無罪陛下不宜棄先帝盟約書奏不報以年老乞骸不許十二年爲南院樞密使復改北院更王齊是歲薨追贈大丞相晉國王諡曰貞爲人廉謹有禮法雖以椒房親位高益畏太后有賜輒辭不受妻子無驕色與人交始終如一所薦拔皆忠直士嘗語人曰樞密選賢而用何事不濟若自親煩碎則大事凝滯矣自蕭合卓以吏才進其後轉効不知大體歎曰不能移風易俗偷安爵位臣子之道若是乎時稱爲國寶臣目所著文曰寶老集二子 蕭阿剌字阿里懶幼養宮中興宗尤愛之重熙六年爲弘義宮使累遷國舅詳穩北院樞密同知加同中書門下平章事出爲東京留守二

十一年拜西北路招討使封西北郡王尋尚秦晉國王公主拜駙馬都尉清寧元年遺詔拜北府宰相兼南院樞密使進韓王明年改北院樞密使徙王陳與蕭革同掌國政惡其諂諛不法爭之不得告歸上由此惡之除東京留守會南郊以例赴闕帝訪時務條陳利病言甚激切革以事中傷帝怒絰殺之皇太后營救不及大慟帝乃優加賻贈葬乾陵之赤山爲人性忠果耽世務有經濟才議者以謂其人若在無重元乙辛之亂、僅八字周隱七歲以戚屬加左右千牛衛大將軍重熙初補祗候郎君性廉介風姿爽朗善毬馬馳射帝每燕飲喜諧謔雖承寵顧常以禮自持時人稱之以柴冊禮恩加檢校太傅永興宮使總領左右護衛同知點檢司事尚魏國公主拜駙馬都尉爲北院宣徽使仍總知朝廷禮儀重熙末出爲西北路招討使武寧郡

王居官以治稱清寧初薨年三十九追封齊王 弟孝先字延
寧小字海里統和十八年補祇候郎君尚南陽公主崔八拜駙
馬都尉開泰五年爲國舅詳穩將兵城東郛還爲南京統軍使
太平三年爲漢人行宮都部署尋加太子太傅五年遷上京留
守以母老求侍改東京留守國初遼東來附未有權酤鹽麴之
法閉市之征亦甚寬施及戶部使馮延休韓紹勲相繼以法繩
之民不堪命燕又仍歲大饑戶部副使王嘉獻計造船使民漕
粟以振燕民水路艱險多至覆沒民怨思亂大延琳乘之殺紹
勲與嘉以快衆心并四捷軍都指揮使蕭頗得延琳遂僭位號
其國爲興遼年爲天慶副留守王道平夜踰城告變被圍數月
穴地而出惟公主在後爲守陴者覺而止事平復爲上京留守
十一年帝不豫欽哀召總禁衛事弒仁德皇后其謀居多及欽

哀攝政親信之遙授天平軍節度使爲北府宰相加守司徒兼政事令重熙初封楚王爲北院樞密使好惡自恣權傾人王朝多側目二年復與謀廢立事覺帝勒衛兵出宮召孝先至諭以廢太后意震懾不能對太后遷慶州孝先恆鬱鬱不樂四年徙王晉六年爲南京留守卒諡忠肅子撒鉢歷官使相孫得里底字紉鄰軀短而僂外謹內倨太康中補祇候郎君遷典聖宮副使兼同知中丞司事姪女爲燕王妃大安中生子領寧遠軍節度使充長寧宮使壽隆二年監討達里得拔思母二部多俘而還改南京留守同知乾統元年爲北面林牙北院樞密同知詔與耶律阿思同治乙辛餘黨納賄附會多出其罪擢知北院樞密事遣使宋爲李乾順約和宋旣許令得里底受書臨行對宋主發函讀之還朝議以爲是天慶三年加守司徒封蘭陵郡

王不合人望五年九月出爲西南面招討使八年復召天祚寵
任之值諸路大亂飛章告急絡繹而至咸不以間有功者亦無
甄別由是將校怨怒人無圖志保大二年金兵至嶺東會耶律
撒八習騎撒跋等謀立晉王敖盧幹事泄上召與議曰反者必
以此兒爲名若不除去何以獲安得里底唯唯竟無一言申理
王旣死人心益離金兵踰嶺天祚率衛兵先遁元妃蕭氏責之
曰爾任國政致君至此何以生爲時但謝罪不能對明日天祚
怒逐之爲耶律高山奴執送金兵同守者懈脫身亡歸復爲耶
律九斤所得送之耶律淳時淳已僭號自知不免不食數日而
死子麼撒爲金兵所殺弟孝忠小字圖古立志慷慨開泰
中補祇候郎君尙越國公主拜駙馬都尉累遷殿前都點檢太
平中擢北府宰相重熙七年爲東京留守時有渤海人擊毬孝

忠言東京最爲重鎮無從舍之地若非毬馬何以習武且天子以四海爲家何分彼此宜弛其禁從之一年詔察官吏有廉幹清疆者具以名聞十二年入朝封楚王拜北院樞密使國制分契丹漢人北南院治之奏以一國二樞風俗所以不同蓋併爲一事未及行而薨追封楚國王帝素服哭臨赦死囚爲之薦福葬日親臨賜宮戶守塚子阿速清寧中爲北府宰相終南院樞密使 孝友字撻不衍小字陳留開泰初以戚屬爲小將軍太平元年大冊加左武衛大將軍檢校太保賜今名重熙元年累遷西北路招討使封蘭陵郡王八年進王陳先是蕭惠爲招討專以威制諸夸多叛孝友下車厚加綏撫每入貢輒增其賜物羗人以安久之寢成姑息諸夸桀驁之風遂熾議者譏其過中十年加政事令賜効節宣庸定遠功臣更王吳後以葬兄孝穆

孝忠還京師拜南院樞密使加賜翊聖協穆保義功臣進王趙
拜中書令母憂起復轉北府宰相出爲東京留守十八年再伐
夏以蕭惠爲河南道行軍都統孝友并漢王貽不副之進兵失
利帝欲誅之賴太后救免復官徙王燕改上京留守更王泰清
寧初加尚父頃之復留守東京明年復任北府宰相帝親製誥
詞以褒寵之柴冊恩遙授洛京留守益賜純德功臣致仕進封
豐國王坐子胡覲與重元謀亂伏誅

蕭柳字徒門幼養于伯父排押家多知能文膂力絕人統和中
叔父恆德臨終薦其才詔入侍衛十七年南伐宋將范延召列
方陣而待時皇弟隆慶爲先鋒問諸將佐誰敢當先者柳願得
駉馬攬其轡謂諸將曰陣若動諸君急攻遂馳而前敵少却隆
慶席勢攻之南軍遂亂柳中流矢累創而戰衆皆披靡時排押

畱守東京奏柳爲四軍兵馬都指揮使秩滿百姓願畱復任許之從伐高麗遇大蛇當路拔劍斷之師還致仕生平好滑稽雖君臣燕飲詼諧無所忌時故比之俳優臨終謂人曰吾少欲致君志不能直遂故以諧進冀萬有一補頃之被寢衣而坐呼曰吾去矣言訖而逝耶律觀音奴集所著詩千篇目曰歲寒集

蕭惠字伯仁小字脫古思初爲國舅詳穩從伯父排押征高麗軍律整肅至奴古達北嶺高麗阻險以拒力戰破之及攻開京授契丹行宮都部署開泰二年改南京統軍使未幾爲右夸夷畢加同中書門下平章事朝議以遼東重地非勲戚不能鎮撫命惠爲東京畱守尋改西北路招討使封魏國公太平六年討回鶻阿薩蘭部徵兵諸路獨阻卜部長直刺後期立斬以徇三月來侵破之進至甘州攻圍三日不克而還阻卜部長烏八密

告直刺之子聚兵來襲惠未之信會西阻卜叛襲三克軍都監
涅魯古突舉部節度使耶律諧理阿不呂等將兵三千來救遇
敵于可敦城西南諧理中流矢阿不呂戰歿士卒潰散惠倉卒
列陣敵出不意來攻衆請乘時奮擊惠以我軍疲敝未可用勿
聽烏八請以夜斫營惠又不許阻卜歸惠乃設伏邀之前鋒始
交敵敗走凡爲招討累年屢遭侵掠士馬疲困西北路招討使
小校掃姑訢其三罪詔都監奧骨禎按之七 years 左遷南京侍衛
親軍馬步軍都指揮使權燕京留守十年轉南京統軍使興宗
卽位擢知興中府歷順義軍節度使東京留守西南面招討使
加開府儀同三司檢校太師兼侍中封鄭王賜推誠協謀竭節
功臣重熙六年復爲契丹行宮都部署加守太師徙王趙拜南
院樞密使更王齊帝欲謀取三關集羣臣議惠曰兩國疆弱聖

慮所悉宋人西征有年師老民疲陛下親率六軍臨之其勝必
矣帝從惠言遣使索宋十城會諸軍于燕惠與太弟帥師歷宋
境以首事功進王韓十二年兼北府宰相同知元帥府事兼北
樞密使十三年帝親征夏國李元昊懼而請降惠言其忘奕世
恩輒萌姦計車駕親臨不盡歸所誘山南党項諸部天誘其衷
使彼來迎天與不圖後悔何及帝從之詰旦進軍夏人列拒馬
河西蔽盾以立惠擊敗之元昊走惠麾先鋒及右翼邀之夏人
千餘潰圍出我師逆擊大風忽起飛沙眯目軍亂夏人乘之蹂
踐死者不可勝計詔班師十七年尚帝姊秦晉國長公主拜駙
馬都尉諒祚立復征夏國惠自河南進戰艦糧船綿亘數百里
旣入敵境偵候不嚴載鎧甲於車軍士不得乘馬諸將咸請備
禦惠詰其妄言謂諒祚必自迎駕何暇及我候者報夏師至惠

與麾下不及甲而走過追者幾不免軍士死傷尤衆師還詔釋其罪十九年請老賜肩輿入朝策杖上殿封魏國王詔冬夏赴行在參決疑議既歸遣賜湯藥及他賜賚不絕每生日輒賜詩以示尊寵清寧二年薨年七十四遺命家人薄葬計聞輟朝三日惠性寬厚自奉儉薄典宗使恣取珍物辭曰臣以戚屬據要地祿足養廉奴婢于餘不爲闕乏陛下猶有所賜設貧於臣者何以待之帝嘉其知足故雖敗衄亦不之罪弟虛列統和中爲寧海軍節度使重熙十四年加侍中除南京統軍使封遼西郡王二十一年轉北府宰相徙遼興軍節度使進封鄭王道宗卽位遺詔改武定軍二子元古匿北院大王契丹行宮都部署終北府宰相慈氏奴字寧隱太平初補祗候郎君上愛其勤慎陞開撒拔加右監門衛上將軍西邊有警授西北路招討都

監領保大軍節度使政濟恩威諸部悅附入爲殿前副點檢歷
烏古敵烈部詳穩征李諒祚爲統軍都監與西北路招討使敵
魯古率蕃部諸軍猶北踰涼州獲諒祚親屬夏人扼險以拒
中流矢卒年五十一贈同中書門下平章事 諡理者字烏古
突舉部人嘗從斜軫擒楊繼業居先鋒偵候有功伐宋率精騎
先由便道渡淳沱河獲其將康保威以功世預節度使選

蕭敵烈字涅魯衮宰相撻烈四世孫其人識度宏遠爲鄉里推
重始爲牛羣敵史聖宗聞其賢召入侍遷國舅詳穩嘗諫伐高
麗時帝居皇太后喪略言國家連年征討士卒抗敵年穀不登
創痍未復島蕞小國城壘完固勝不爲武萬一失利恐貽後悔
雖以康肇有罪宜先遣使往問其故彼若伏罪則已不然俟服
除歲豐舉兵未晚時令已下言雖不行識者趨之明年同知左

今离畢事改右夸离畢開泰初率兵巡西邊追擒夸离董部下
開撒狻撲里失室勃葛部民遁者令復其業三年六月合拔里
乙室二國舅爲一帳命總爲詳穩從樞密耶律世良伐高麗詔
與東京留守耶律國石等造浮梁於鴨綠江城保宣義定遠等
州還加同政事門下平章事拜上京留守封漆水郡王加號尚
父爲人寬厚達政體廷臣皆謂有王佐才王繼忠又薦之興宗
疑其有黨重熙元年三月復爲惕隱轉任南院大王中京留守
卒 弟拔刺字別勒隱多智善騎射開泰間始補郎君累遷奚
六部禿里太尉命將北南院兵往討大延琳易兩院旗幟鼓勇
力戰破之上聞以手詔褒獎賜內廐馬重熙中遷四捷軍詳穩
謝事歸鄉里數歲起爲昭德軍節度使尋改國舅詳穩卒
蕭蒲奴字留隱奚王楚不寧之後幼孤貧備於醫家牧牛醫者

見其熟寐有蛇遶身異之教以讀書聰敏嗜學不數年涉獵經史習騎射既冠意氣豪邁開泰間選充護衛俄坐罪黜流烏古部久之召還累任煩劇遷奚六部大王治理有聲太平九年爲都監將右翼軍討大延琳遇賊戰蒲水夾攻潰之仍先據高麗女直要衝使不得求援延琳走入城蒲奴不介馬而馳追殺餘賊已而討諸叛邑平吼山賊延琳堅守不敢出被擒以功加兼侍中重熙六年改北阻卜副部署再授奚六部大王十八年爲西南面招討使西征夏國引兵二千據河橋聚巨艦數十仍作大鉤戰之日布舟于河綿亘三十餘里遣人伺上流有浮物輒取之時未知大軍失利適有大木順流而下勢將壞浮梁斷歸路操舟者爭鉤致之橋得不壞明年復與北院大王宜新林牙蕭撒末領兵行宮都部署別古得監戰以伐夏懸兵深入不與

敵遇縱軍大掠而還復爲奚六部大王致仕卒

蕭特末字何寧與兄和尚字洪寧俱國舅大父房之後和尚爲人忠直多智畧開泰初補御蓋郎君尋爲內史太醫等局都林牙使宋賀正將宴相禮以錦服爲賜典儀者告班節度使下辭曰班次如此如待蕃部何名大國之使吾不預宴宋臣不能對易以紫服位視執政使禮始定八年秋爲唐古部節度使卒特末爲人機辨任氣太平中累遷安東軍節度使有能稱十一年召爲左祇候郎君班詳穩未幾遷左右衛軍重熙十年累遷北院宣徽使使宋歸稱旨加同政事門下平章事詔城西南渾底甸還復爲北院宣徽使卒

蕭韓家奴字括寧奚長渤海恩之後性孝友太平中補祇候郎君累遷敦睦宮使伐夏爲左翼都監遷北面林牙俄爲南院副

部署賜玉帶改奚六部大王治有聲重熙六年爲各官都部署
清寧初封韓國公歷南京統軍使北院宣徽使封蘭陵郡王開
重元亂馳詣行在與南府宰相蕭唐古樞密副使蕭惟信敦睦
宮使耶律良率宿衛士馮家奴等禦之帝以無患明旦重元復
誘夫獵夫來獨出諭之汝曹去順効逆徒取族滅莫若悔過轉
禍爲福獵夫授仗首殿以功遷殿前都點檢封荆王賜資忠保
義奉國竭貞平亂功臣惟信馮家奴等並加太子太傅耶律良
籍橫帳存弼董房塔不也同知檢校司事成雍二年遷東北路
統軍使八年由南院樞密同知擢知左存弼畢事太康三年加
尚父封吳王賜白海東青鶴上書力陳乙辛誣構皇太子不報
擢知北院樞密副使爲漢人行宮都部署四年轉西南面招討
使五年例削一字王再改王蘭陵薨子楊九終右祇候郎君班

詳穩贈同中書門下平章事

蕭德字特末隱栢特部人德性和易篤學好禮法太平中領牌
印直宿累遷北院樞密副使敷奏詳明多稱上旨詔與耶律庶
成修律令成改契丹行宮都部署賜宮戶十有五清寧元年遷
北院樞密同知封魯國公重以先朝眷遇拜南府宰相五年轉
南京統軍使重元亂摧鋒力戰斬涅魯古首以獻論公封漢王
咸雍初告老優詔不許久之加尚父致仕卒年七十二

蕭惟信字耶寧栢特部人五世祖霞賴南府宰相曾祖烏古中
書令祖阿古只知平州父高八多智數博覽古今開泰初爲北
院承旨稍遷右丞相以幹敏稱拜南府宰相累遷倒塌嶺節
度使知興中府陵青誘衆作亂事覺高八按之止誅首惡餘並
釋之歸奏稱旨惟信資沉毅篤志于學能辨論重熙初始仕累

遷左中丞十五年徙燕趙國王傅帝面諭燕趙左右多面諛不
聞忠言浸以成性汝當以道規誨使知君父之義有不可處王
邸者以名聞惟信輔導以禮十七年遷北院樞密副使坐事免
官尋復職兼北面林牙以從仁先破重元賜竭忠定亂功臣清
寧中歷南京留守左右忤高罕知北南兩院樞密使事成雍七
年爲南府宰相兼契丹行宮都部署太康中以老乞骸不聽又
數廷諍乙辛諸廢太子言皆不用固請老加守司徒卒

蕭樂音奴字婆丹奚六部敝穩奚呂不六世孫父拔刺早卒年
始三歲母喪毀瘠過甚養于家奴奚列阿不重熙初興宗獵奚
山過其居奚列阿不言于近臣得見上年甫十歲氣象如成人
帝悅之錫賚甚厚既長有遠志不樂仕進隱于奚王嶺之插合
谷上以其名家又有時譽就拜舍利軍詳穩爲人貌偉言辨通

遼漢文字善騎射擊鞠所交皆一時名士年四十始爲護衛平
重元亂以功遷護衛太保改本部南剋俄爲旗鼓拽刺詳穩監
障海東青鶻獲白花者十三賜槽柚犀并玉吐鶻拜五蕃部節
度使卒 子陽阿字稍隱爲人端毅簡嚴識遼漢字通天文相
法父卒自五蕃部親挽喪車至奚王嶺人稱其孝年十九爲本
班郎君歷鐵林鐵錫大鷹三軍詳穩乾統元年由烏古敵烈部
屯田太保爲易州刺史華臣劉彥良嘗以事至州怙寵恣橫爲
陽阿所沮及歸妄加毀訾尋遣人代陽阿州民千餘詣闕請留
卽日授武安州觀察使歷烏古涅里順義彰信等軍節度使權
知東北路統軍使事開耶律郎不鐸魯幹等叛獨引麾下三十
餘人追捕之身被二創生擒十餘人送之行在坐不獲首惡免
官未幾權南京留守卒

蕭清冽字圖寧遙捧鮮質可汗官人重熙初遙攝鎮國軍節度使六年未詔使宋因傷足不告遂行帝怒及還決以大杖降同發南京留守事遙授靜江寧節度使歷羣牧都林牙累遷右丞相畢以才幹見任使會車駕西征元昊乞降帝以前後反覆遣往覘誠否因爲元昊陳述禍福聽命乃還拜北院樞密副使出爲中京留守十九年改西京留守卒

蕭朮哲字石魯隱孝穆弟高九之子以戚屬加監門衛上將軍重熙十三年將衛兵討元昊有功遷典聖宮使蒲奴里部長陶得里叛命爲統軍都監與都統耶律義先不協誣義先罪免官稍遷西南面招討都監坐事下獄以太后言杖而釋之清寧初爲國舅詳穩西北路招討使威行諸部坐私取官粟三百斛及代留畜產令主者鬻之以償後族弟胡覩到部發其事帝怒決

以大杖免官尋起拜昭德軍節度使徵爲北院宣徽使九年復爲西北路招討使訓士卒增器械省追呼嚴號令人不敢犯邊境宴然十年入朝封柳城郡王咸雍二年拜北府宰相爲乙辛所忌詎與護衛蕭忽古等謀害乙辛詔獄無狀出鎮順義軍卒追王晉宋梁三國姪藥師奴切頴悟謹禮法補祇候郎君太康中爲興聖宮使累遷殿前點檢同知宿衛嚴肅遷南院樞密同知壽隆三年爲右弼單夏王李乾順爲宋所攻命持節使宋請罷兵通好宋從之還拜南面林牙兼知契丹漢人行宮都部署事乾統初出爲安宋軍節度使卒

蕭烏野字草隱其先出興聖宮分觀察使塔里直之孫性孝悌尚禮法雅爲鄉黨所稱重熙中補護衛與宗見其勤恪遷護衛太保以佐耶律仁先平重元功加團練使時敵烈部數爲鄰部

侵擾民多困弊命爲其部節度使恤困窮省徭役不數月部人以安尋以母老歸養於家母亡尤極哀毀服闋歷官興聖延慶二宮使卒

蕭韓家與常哥俱國舅之族性端簡謹愿動循禮法清寧中爲護衛太保太康二年遷知北院樞密副使三年經畫西南邊天池舊塹立堡砦正疆界刻石而還爲漢人行宮都部署是年秋獵厚馬卒蕭常哥字胡獨董祖約直同政事門下平章事父實老累官節度使常哥魁偉寡言年三十餘始爲祇候郎君歷本族將軍松山州刺史壽隆二年以女爲燕王妃拜永興宮使及妃生子遷左監門衛將軍久之爲南院宣徽使六年改漢人行宮都部署乾統初加太子太師爲國舅詳穩二年改遼興軍節度使召爲北府宰相以柴冊禮加兼侍中天慶元年改仕卒

諡曰欽肅

蕭廷魯字胡突董五院部人節度使約質之子重熙間爲牌印郎君清寧九年重元亂平其黨郭九等亡詔追捕獲之遷護衛太保咸雍元年使宋議邊事稱旨知殿前副點檢事五年阻卜叛爲行軍都監擊敗之俘獲甚衆俄坐過期糧乏士伍離失詔免官會北部兵起使將烏古敵烈兵擊敗之每戰以身先詔釋前罪命總知烏古敵烈部九年敵烈叛合邊人掠居民都監耶律獨迭以兵少不戰屯臚胸河廷魯率精騎四百力戰敗之盡獲其輜重繼聞切長合木三千餘騎掠附近部落縱兵躡其後連戰二日斬數千級盡得被掠人畜而還又值餘黨五百騎劫捕鷹戶復逆擊走之俘斬甚衆自是勢沮時敵烈方爲患繼以阻卜寇掠邊人疲弊朝廷以地遠不能時益援軍而使疆圉帖

然者皆迂魯力也。帝嘉其功，拜左皮室詳穩。會宋求天池之地，復詔兼統兩皮室軍屯太牢古山以備之。太康初，阻卜叛，遷西北招討都監。從都統耶律趙三征討有功，改南京統軍都監。黃皮室詳穩未幾，遷東北路統軍都監卒。弟鐸盧幹字撒板幼警悟，異常兒。三歲失母，哭盡哀。見者傷之。及長，魁偉沉毅，好學。善屬文，有才幹。年三十始仕，爲朝野推重。給事北院知聖旨事。素與蕭巖壽善。太康二年乙辛誣以罪，謫戍西北部特恩滅死。仍錮終身。在戍十餘年，太子事稍直，始得歸鄉屏居謝事。一日臨流聞雉鳴，作古詩三章見志。當時名士稱其高情雅韻不減古人。壽隆六年卒。年六十一。乾統初，贈彰義軍節度使。

蕭塔列葛字雄隱，與素蠟俱五院部人。八世祖只魯選，輦氏時嘗爲虞人。唐安祿山來攻，戰於黑山之陽，敗之以功，爲北府宰。

相世預其選塔列葛仕開泰間累遷西南面招討使重熙十一年使西夏諭伐宋事約元昊出別道以會十二年改右夸葛畢南京留守同知轉左夸葛畢俄授東京留守十六年以世選爲北府宰相二十一年復爲南京統軍使卒 蕭素颯字特免重熙間始仕累遷北院承旨彰愍宮使清寧初歷左皮室詳穩右夸葛畢咸雍四年爲中京留守五年討降割阿里部率其叛帥來朝有功徙北院林牙改南院副部署卒 子謀魯幹字回璉初補夸葛畢郎君遷文班太保太康中改南京統軍使爲右夸葛畢與阿思論事不合見忌出爲馬羣太保北部來侵破之以功遷烏古敵烈統軍同知許便宜行事後以讎毀降領西北路戍軍復官卒

蕭兀納一名撻不也字特免六院部人其先嘗爲西南面拽刺

元納魁偉簡重善騎射清寧初其兄圖獨薦召對補祇候郎君
遷近侍敬史護衛太保太康初爲北院宣徽使時乙辛謀害太
子因言宋魏國王和魯幹之子淳可爲儲嗣羣臣莫敢言惟元
納與蕭陶隗諫曰舍嫡不立是以國與人也帝猶豫不決五年
正月上將出獵乙辛請留皇孫帝欲從之元納奏竊見皇孫年
幼左右保護萬一匪人恐有他變臣願留保護以防不測帝乃
悟擢南院樞密同知仍嘉其忠封蘭陵郡王人稱以古社稷臣
尋授殿前都點檢王師需耶律固等咸薦其忠純雖伏仁傑輔
唐屋質立穆宗無以過乃令輔導燕王益見優寵大安初詔尚
越國公主固辭改南院樞密使奏請掾史宜以歲月遷敘從之
壽隆元年拜北府宰相天祚在潛邸屢以直言忤旨卽位加守
太傅出爲遼興軍節度使俄佛殿小底王華誣以借內府犀角

詔鞠之自辨臣在先朝詔日取帑錢十萬爲私費臣未敢妄取其一肯借犀角乎上愈怒奪太傅官降寧邊州刺史尋改臨海軍節度使上書言自蕭海里亡入女直彼有輕朝廷心宜益兵以備不虞不報天慶元年知黃龍府事改東北路統軍使數上書臣治與女直接境觀其所爲志不在小宜先其未發舉兵圖之復不聽及金兵來侵戰于寧江州其孫移敵蹇死之兀納退走入城畱官屬守禦自以三百騎渡混同江西城遂陷又與蕭敵里拒金兵于長濶軍敗免官五年天祚親征兀納敗復敗績授上京留守六年耶律章奴攻京城兀納發府庫以資士卒諭以逆順以死拒戰章奴無所得而去以功授副元帥尋爲契丹都宮使天祚外雖以先朝重臣有定策勲每延問政事終不能用以疾卒年七十 蕭陶隗字烏古鄰宰相轄特六世孫爲人

剛直有威重咸雍初任馬羣太保素知羣牧名存實亡上下相
蒙悉閱舊籍除其羸病錄其實數著爲定籍牧人畏服公私兩
濟畜產歲以蕃息太康中累遷右丞相畢權知東京留守大安
七年爲契丹行宮都部署上嘗語羣臣北樞密院軍國重任久
闕其人耶律阿思蕭幹特刺二人孰愈羣臣各譽所長陶隗獨
默上問卿何不言對曰特刺懦而敗事阿思有才而貪將爲禍
基不得已而用敗事猶勝基禍上謂其言雖魏徵不能過但恨
吾不及太宗爾然竟以阿思爲樞密使由是阿思銜之九年西
園不寧擇重臣鎮撫拜西南面招討使阿思陰與蕭阿忽帶誣
奏賊掠漠南牧馬及居民畜產陶隗不急追捕罪當死詔免官
久之起爲場母城節度使未行疽發背卒生平負氣怒則須髯
輒張每有大議必毅然決之雖上有難色未嘗遽已見權貴無

少屈竟爲所陷時人惜之二子圖木轄式阿思死始獲進用
蕭陶蘇幹突呂不部人四世祖因吉祖里拔與隗部節度使陶
蘇幹謹愿不妄交雖幼已如成人初補筆硯小底累遷祇候郎
君轉樞密院侍御咸雍五年遷崇德宮使會有訴北南院聽訟
不直者事下陶蘇幹悉改正之爲耶律阿思所忌帝欲召用輒
爲沮抑歷漠北滑水馬羣太保數年不調乾統中改漠南馬羣
以大風傷草馬多死被杖免官九年徙天齊殿宿衛時穀價翔
踊宿衛士多不給至出私廩賙之召爲南院樞密同知天慶四
年授漢人行宮副部署時金兵初起攻陷寧江州天祚召羣臣
議奏曰女直國雖小其人勇而善射自執我叛人蕭海里氣勢
益張我兵久不練若遇強敵稍有不利諸部離心不可制矣宜
大發諸道兵以威壓服之計之上也蕭德厯底阻之謂此謀徒

以示弱但發潯水以北兵足以拒之遂不用其計數月間邊兵屢北人益不安饒州渤海結構以叛帥兵往討擒其渠魁斬級數千得所掠物悉還其主復與留守耶律大悲奴備禦耶律章奴事平上適欲清暑嶺西奏今邊兵解弛漢人嘯聚車駕若行民心益搖勸罷不納命下令控扼東路招集散卒後以太子太傅致仕卒 大悲奴字休堅王子班聶里古之後爲北面林牙咸雍中由漢人行宮副部署陞都部署太康中歷永興延昌宮使右皮室詳穩奉詔招降阻卜壽隆元年爲右夸葛畢二年拜殿前都點檢乾統初爲上京留守授惕隱改西南面招討使天慶中領北南樞密院點檢中丞諸司等事歷彰國始平二軍節度使致仕卒爲人舉止馴雅好禮儀時人稱之

蕭奪刺字按懶通紮注可汗官人祖涅魯古北院樞密副使父

撒抹字胡獨董重熙初補祇候郎君累遷北面林牙十九年從耶律宜新蕭蒲奴伐夏至蕭惠敗績之地獲偵候者知人烟聚落多國人陷沒而不能還者盡俘以歸拜大父敵穩知山北道邊境事清寧初歷西南面西北路招討使加同中書門下平章事卒奪刺體貌豐偉騎射絕人由祇候郎君陞漢人行宮副部署後爲烏古敵烈統軍使克敵有功加龍虎衛上將軍授西北路招討使因陳北邊利害請以本路諸部與倒塌嶺統軍司連兵屯戍再表不納改東北路統軍使乾統元年以久練邊事復爲西北路招討使北阻卜耶剌剌率鄰部來侵奪刺逆擊追奔數十里復乘耶剌剌無備以輕騎襲之獲馬萬五千疋牛羊稱是二年坐違制入朝免官改西京留守復爲東北路統軍卒于官

蕭阿魯希字乙辛隱烏隗部人紕詳穩女古之子少習騎射曉
兵法清寧間始仕累遷木部司徒改烏古敵烈統軍都監咸雍
八年二月壬戌因論詳穩耶律巢討北部功擢巢知北院大王
事以阿魯希代爲詳穩加左監門衛上將軍大安七年遷山北
副部署九年四卜達理得拔思毋二部來侵率兵擊却之七月
復寇倒塌嶺盡掠西路羣牧馬去引兵追及竟獲所掠斬渠帥
數人轉東北路統軍使是冬復引三百餘人梗邊仍戰却之斬
首二百餘級加金吾衛上將軍封蘭陵縣公壽隆元年第功加
同中書門下平章事進爵郡公改西北路招討使乾統三年坐
留宋俘當遣還者爲奴免官後被徵以老疾致仕卒

弘備錄卷一百九

終